

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na ____ sjednici održanoj dana _____.2016. godine, d o n o s i

Z A K O N
o izmjenama Zakona o socijalnoj zaštiti,
zaštiti civilnih žrtava rata i zaštiti porodice sa djecom

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11 i 3/15), član 123. mijenja se i glasi:

„(1) Nakon isteka porodiljskog odsustva žena-majka koja rodi blizance, treće i svako slijedeće dijete, a koristi pravo da radi polovinu punog radnog vremena u skladu sa propisima o radu, ima pravo na naknadu plaće za polovinu do punog radnog vremena koju joj isplaćuje poslodavac u iznosu od 50 % plaće koju bi ostvarila da radi puno radno vrijeme.

(2) Pravo da radi polovinu punog radnog vremena žena-majka iz stava (1) ovog člana ima do navršene dvije godine života djeteta, počevši od prvoga dana korištenja prava.

(3) Zahjev za ostvarivanje prava za rad sa polovinom punog radnog vremena i za naknadu plaće podnosi se poslodavcu 15 dana prije isteka porodiljskog odsustva.“

Član 2.

U članu 125. u stavu (1) procenat „20 %“ mijenja se procentom „50 %“.

Član 3.

Zakon stupa na snagu narednog dana od dana objavljivanja u “Službenim novinama Zeničko-dobojskog kantona”.

Broj: _____/16

Datum, _____.2016. godine

Z e n i c a



PREDSJEDAVAJUĆA

Draženka Subašić, s.r.

O b r a z l o ž e n j e

Prijedloga Zakona o izmjenama Zakona o socijalnoj zaštiti, zaštiti civilnih žrtava rata i zaštiti porodice sa djecom

I PRAVNI OSNOV

Ustavni osnov za donošenje Zakona, sadržan je u odredbama člana 37. stav (1) tačka f) Ustava Zeničko-dobojskog kantona, kojim je propisano da Skupština donosi zakone i ostale propise za izvršavanje kantonalnih nadležnosti.

Ustavni osnov za donošenje Zakona sadržan je i u odredbama člana 17., člana 18. tačka k. i člana 19. tačka e. Ustava Zeničko-dobojskog kantona, prema kojima Kanton ima sve nadležnosti koje nisu Ustavom Federacije izričito povjerene federalnoj vlasti, a naročito je nadležan za provođenje socijalne politike i uspostavu službi socijalne zaštite, a utvrđivanje socijalne politike u zajedničkoj je nadležnosti federalne vlasti i kantona koje se u pogledu ove nadležnosti dogovaraju na trajnoj osnovi.

II RAZLOZI ZA DONOŠENJE

Institucija Ombudsmena za ljudska prava BiH, na inicijativu Zastupničkog doma Parlamenta Federacije BiH, provela je istraživanje o stanju zaštite majke i materinstva u Federaciji BiH, te izradila „Specijalni izvještaj o stanju zaštite majke i materinstva na području Federacije BiH“. Analizirajući stanje zaštite majke i materinstva u Federaciji BiH Institucija Ombudsmena dala je nekoliko preporuka, koje se odnose i na područje Zeničko-dobojskog kantona. Ombudsmeni ukazuju na potrebu vlasti u Zeničko-dobojskom kantonu da periodično razmatraju da li je podrška porodicama sa djecom bazirana na stvarnim potrebama njihovih domaćinstava, kako bi se osiguralo pravo svake osobe na životni standard. Vlada je na prijedlog Ministarstva Zaključkom broj:02-35-20920/15 od 26.11.2015. godine prihvatila Informaciju o stanju zaštite majke i materinstva na području Zeničko-dobojskog kantona u odnosu na nalaz i mišljenje Institucija Ombudsmenaza Zeničko-dobojski kanton i preporuke definisane u Specijalnom izvještaju.

U oblasti zaštite majke i materinstva na području Zeničko-dobojskog kantona, predlažemo pokretanje i provođenje pronatalitetne politike u svim relevantnim sektorima s obzirom da je Zakon o zaštiti porodice sa djecom na federalnom nivou već duži period u proceduri donošenja.

Uzimajući u obzir tendenciju pada nataliteta u FBiH, koja je prema podacima Zavoda za statistiku Federacije BiH evidentirana tokom 2013. i 2014. godine, kao i tešku ekonomsku situaciju u čitavoj Bosni i Hercegovini predlaže se donošenje Zakona o izmjenama Zakona o socijalnoj zaštiti, zaštiti civilnih žrtava rata i zaštiti porodice sa djecom.

Ovo s obzirom da su prava iz oblasti zaštite majke i materinstva na području Zeničko-dobojskog kantona regulirana Zakonom o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11 i 03/15).

Imajući u vidu da nije u pitanju složen i obiman zakon, a uređuju se pitanja od uticaja za poboljšanje položaja porodice sa djecom, smatramo da su ispunjeni uslovi iz člana 140. Poslovnika Skupštine Zeničko-dobojskog kantona – Novi prečišćeni tekst („Službene novine Zeničko-dobojskog kantona“, broj: 7/12 i broj: 12/13) za donošenje zakona po skraćenom postupku.

III NAČELA NA KOJIMA SE ZASNIVA ZAKON

Zaštita majke i materinstva je jedna od ključnih obaveza Bosne i Hercegovine kada su u pitanju međunarodni standardi ljudskih prava.

IV OBJAŠNJENJE PREDLOŽENIH RJEŠENJA U OVOM ZAKONU

Članom 1. Prijedloga zakona mijenja se član 123. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11 i 3/15), kako bi se popravio položaj žene-majke u radnom odnosu, koja rodi blizance, treće i svako slijedeće dijete. Predlaže se da ukoliko žena-majka koristi pravo da radi polovinu punog radnog vremena u skladu sa propisima o radu, ima pravo na naknadu plaće za polovinu do punog radnog vremena koju joj isplaćuje poslodavac u iznosu od 50 % plaće koju bi ostvarila da radi puno radno vrijeme.

Takođe predviđa se da ovo pravo žene-majke traje do navršene dvije godine života djeteta, počevši od prvoga dana korištenja prava.

Zahjev za ostvarivanje prava za rad sa polovinom punog radnog vremena i za naknadu plaće podnosi se poslodavcu 15 dana prije isteka porodiljskog odsustva.

Članom 2. Predloga zakona predviđa se izmjena člana 125. tako da se procenat naknade plaće roditeljima koji imaju djecu sa težim smetnjama u razvoju povećava sa 20% na 50% od plaće koju bi ostvario za rad sa punim radnim vremenom. Na ovaj način popravljaju se položaj zaposlenim roditeljima koji imaju djecu sa težim smetnjama u razvoju.

V FINANSIJSKA SREDSTVA ZA SPROVOĐENJE ZAKONA

Na osnovu predloženog člana 1. Zakona o izmjenama Zakona o socijalnoj zaštiti, zaštiti civilnih žrtava rata i zaštiti porodice sa djecom, sredstva koja su do sada isplaćivana iz Budžeta u iznosu 10% sredstava na naknadu plaće za polovinu do punog radnog vremena, sada treba da isplaćuje poslodavac u iznosu od 50 % . S tim u vezi, zaposlenim porodiljama koje ostvare ovo pravo, a poslodavac im je Zeničko-dobojski kanton, iz Budžeta kantona će biti isplaćivana plaća u punom iznosu. Što znači da će do većeg izdvajanje sredstava iz Budžeta biti samo u slučaju eventualnog radnog angažovanja, odnosno zapošljavanja osoba za drugu polovinu radnog vremena. Tokom 2015. godine i u januaru 2016. godine naknadu plaće za polovinu do punog radnog vremena u iznosu 10% ostvarila je samo jedna porodilja u Gradu Zenica. Odnosno, od 965 zaposlenih majki-porodilja koje su pravo na naknada umjesto plaće ženi-majci u radnom odnosu ostvarile tokom 2015. godine, rođenje trećeg, četvrtog ili narednog djeteta imalo je 44 porodilje, a to znači, da bi po osnovu predloženih izmjena tokom 2015.godini ovo pravo eventualno mogle ostvariti 44 zaposlene porodilje.

Na osnovu predloženog člana 2. Zakona o izmjenama Zakona o socijalnoj zaštiti, zaštiti civilnih žrtava rata i zaštiti porodice sa djecom omogućit će se veća naknada roditelju djeteta sa težim smetnjama u razvoju, pod uslovima propisanim ovim Zakonom, na 50% naknade plaće, što je više za 30% potrebnih sredstava u odnosu na važeći Zakon. Na predloženi način, ovi roditelji bi za polovinu radnog vremena, kada ne rade ostvarivali 50% naknade od visine njihove pune plaće iz Budžeta Kantona. Stoga je za ovo pravao potrebno obezbijediti dodatna sredstva u Budžetu Kantona. Tokom 2015. godine ovo pravo je ostvarivao samo jedan roditelj u općini Usora.

U Zenici, 10.02.2016. godine

Ministarstvo za rad, socijalnu politiku i izbjeglice

MINISTAR

Nurdehan Šahinović





SLUŽBENE NOVINE

ZENIČKO - - DOBOJSKOG KANTONA

Godina XII - Broj 13

ZENICA, Četvrtak, 26.07.2007.

SKUPŠTINA

158.

Na osnovu člana 37. stav (1) tačka (f) Ustava Zeničko-dobojskog kantona, Skupština Zeničko-dobojskog kantona na 8. sjednici održanoj dana 27.06.2007. godine, donosi:

ZAKON O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM

DIO PRVI – OSNOVNE ODREDBE

Član 1.

Ovim zakonom bliže se uređuje: socijalna zaštita građana i njihovih porodica; korisnici prava iz socijalne zaštite i osnovna prava iz socijalne zaštite; uvjeti i postupak sticanja prava iz socijalne zaštite kao i iznosi novčanih i drugih davanja; osnivanje i rad ustanova socijalne zaštite; uvjeti, način i postupak ostvarivanja prava civilnih žrtava rata i članova njihovih porodica; uvjeti, način i postupak, organi i finansiranje prava porodice sa djecom; obilježavanje "Dječije nedjelje"; finansiranje prava iz socijalne zaštite, zaštite civilnih žrtava rata i zaštite porodice sa djecom; nadzor nad provođenjem zakona, kaznene odredbe i druga pitanja od značaja za ostvarivanje prava iz socijalne zaštite, zaštite civilnih žrtava rata i zaštite porodice sa djecom u Zeničko-dobojskom kantonu (u daljem tekstu: Kanton).

Član 2.

- (1) Ovaj zakon osigurava jednakost u pristupu i uživanju sadržanih prava.
- (2) Zakon zabranjuje bilo koji oblik diskriminacije, indirektno ili direktno, po bilo kojem osnovu kao što je rasa, spol, jezik, vjera, političko ili drugo mišljenje, nacionalno ili socijalno porijeklo, imovina, rođenje ili drugi status.
- (3) Djelatnost socijalne zaštite, zaštite civilnih žrtava rata i zaštite porodica sa djecom je od interesa za Kanton, kojom se osigurava i ostvaruje pomoć za podmirenje osnovnih životnih potreba socijalno ugroženih, nespo-

sobnih i drugih lica, koje one same ili uz pomoć članova porodice ne mogu zadovoljiti, zbog nepovoljnih ličnih, ekonomskih, socijalnih i drugih okolnosti.

Član 3.

- (1) Djelatnost socijalne zaštite, zaštite civilnih žrtava rata i zaštite porodice sa djecom obavljaju ustanove socijalne zaštite i općinska služba za upravu.
- (2) Ustanove socijalne zaštite imaju svojstvo pravnog lica.
- (3) Na osnivanje i rad ustanova socijalne zaštite primjenjuju se propisi o ustanovama, ako ovim zakonom nije drugačije određeno.
- (4) Djelatnost socijalne zaštite, zaštite civilnih žrtava rata i zaštite porodice sa djecom mogu obavljati i humanitarne organizacije, udruženja, vjerske zajednice i organizacije koje one osnivaju, građanin pojedinac i strana fizička ili pravna lica.

Član 4.

- (1) Porodicu, u smislu ovog zakona, čini: bračni drug, odnosno vanbračni drug, dijete (bračno, vanbračno, usvojeno, pastorče i dijete bez roditelja uzeto na izdržavanje), otac, majka, očuh, maćeha, djed i nena-baba (po ocu i majci) i braća i sestre bračnih drugova.
- (2) Članovi porodice civilne žrtve rata, u smislu ovog zakona, su: bračni drug, djeca (rođena u braku ili van braka, usvojena i pastorčad) - članovi uže porodice, te roditelji i usvojioci, očuh i maćeha - članovi šire porodice.
- (3) Članom porodice u smislu stava (2) ovog člana, smatra se vanbračni drug koji s civilnom žrtvom rata ima djecu i s njom živi, odnosno, živio je do njene smrti u zajedničkom domaćinstvu, najmanje godinu dana.
- (4) Zajedničko domaćinstvo, u smislu ovog zakona, je ekonomska zajednica jedne ili više porodica u kojoj zajednički stiču i troše novčana i druga materijalna sredstva, stečena radom i korištenjem zajedničkih materijalnih dobara (zemljište, zgrade i drugo).

Član 5.

- (1) Djetetom, u smislu ovog zakona, smatra se lice do 18 godina života.

- (2) Izuzetno, djetetom u smislu ovog zakona, smatra se i lice koje radi ostvarivanja prava na dodatak na djecu i osiguravanja školarine ili stipendije za đake i studente, ima i više od 18, a manje od 27 godina života.

Član 6.

- (1) Pravo utvrđeno ovim zakonom ne mogu ostvarivati lica koja su osuđena pravosnažnom sudskom presudom za krivična djela protiv ustavnog poretka Bosne i Hercegovine, ustavnog poretka Federacije Bosne i Hercegovine i krivična djela protiv čovječnosti i međunarodnog prava.
- (2) Pravo utvrđeno ovim zakonom ne može ostvarivati lice koje takvo pravo koristi po drugim propisima.
- (3) Pravo utvrđeno ovim zakonom ne može se prenositi na druga lica, niti se može nasljeđivati.

Član 7.

U postupku ostvarivanja prava i dužnosti utvrđenih ovim zakonom, primjenjuju se odredbe Zakona o upravnom postupku („Službene novine Federacije BiH“, broj: 2/98 i 48/99), ako ovim zakonom nije drugačije određeno.

Član 8.

Predškolske, školske i zdravstvene ustanove, policija, pravosudni i drugi državni organi, pravna i fizička lica koja su po posebnim zakonima određeni za brigu o porodici, djeci i drugim licima koja se ne mogu brinuti sama o sebi, radi zaštite njihovih interesa sarađuju sa ustanovama socijalne zaštite u okvirima svojih nadležnosti.

Član 9.

U slučajevima kada iznosi visine novčane pomoći, odnosno naknade u ovom zakonu nisu fiksno utvrđeni, osnovica za utvrđivanje novčanih i drugih materijalnih pomoći i naknada je prosječna neto plaća Kantona, ostvarena u prethodnoj godini, odnosno godini koja prethodi podnošenju zahtjeva (u daljem tekstu: prosječna plaća Kantona).

DIO DRUGI – SOCIJALNA ZAŠTITA

POGLAVLJE I. POJAM I KORISNICI SOCIJALNE ZAŠTITE

Član 10.

- (1) Socijalna zaštita u smislu ovog zakona je organizovana djelatnost u Federaciji, Kantonu i općini usmjerena na osiguranje socijalne sigurnosti građana i njihovih poro-

dica u stanju socijalne potrebe.

- (2) Socijalnom potrebom, u smislu stava (1) ovog člana, smatra se trajno ili privremeno stanje u kome se nalazi građanin ili porodica, prouzrokovano ratnim događajima, elementarnim nesrećama, općom ekonomskom krizom, psihofizičkim stanjem pojedinca ili drugih razloga, koji se ne mogu otkloniti bez pomoći drugog lica, odnosno pomoći društvene zajednice.
- (3) U skladu sa načelima humanizma, solidarnosti, građanskog morala, socijalna zaštita porodice i njenih članova i građana pojedinaca ostvaruje se otkrivanjem i umanjnjem, odnosno otklanjanjem posljedica i uzroka, koji dovode do stanja socijalne potrebe i sticanjem određenih prava iz socijalne zaštite.
- (4) Socijalna zaštita djeteta, u skladu sa odredbama Konvencije o pravima djeteta, ostvaruje se u najboljem interesu djeteta.

Član 11.

- (1) Korisnici socijalne zaštite, u smislu ovog zakona, su lica koja se nalaze u stanju socijalne potrebe i to:
- djeca bez roditeljskog staranja;
 - odgojno zanemarena djeca;
 - odgojno zapuštena djeca;
 - djeca čiji je razvoj ometen porodičnim prilikama;
 - lica sa invaliditetom i lica ometena u fizičkom ili psihikom razvoju;
 - materijalno neosigurana i za rad nesposobna lica;
 - stara lica, bez porodičnog staranja;
 - lica sa društveno negativnim ponašanjem;
 - lica ovisna o psihoaktivnim supstancama;
 - lica i porodice u stanju socijalne potrebe, kojima je usljed posebnih okolnosti potreban odgovarajući oblik socijalne zaštite.

- (2) Propisom općine može se proširiti krug korisnika socijalne zaštite iz stava (1) ovog člana u skladu sa programima, odnosno planovima razvoja socijalne zaštite, specifičnim prilikama i potrebama.

Član 12.

- (1) Dijete bez roditeljskog staranja, u smislu člana 11. stav (1) tačka a) ovog zakona, je dijete bez oba roditelja, nepoznatih roditelja, napušteno od roditelja, roditelja kojima je oduzeto roditeljsko staranje i roditelja spriječenih da vrše roditeljsku dužnost.
- (2) Odgojno zanemareno dijete, u smislu člana 11. stav (1) tačka b) ovog zakona, je dijete koje, zbog nedovoljnog nadzora i brige roditelja, te negativnog uticaja sredine, narušava opće prihvaćene norme ponašanja.
- (3) Odgojno zapušteno dijete, u smislu člana 11. stav (1)

tačka c) ovog zakona, je dijete koje svojim ponašanjem narušava opće prihvaćene norme i vrši prekršaje ili krivična djela.

- (4) Dijete, čiji je razvoj ometen porodičnim prilikama, u smislu člana 11. stav (1) tačka d) ovog zakona, je dijete, čiji roditelji zbog nesređenih porodičnih odnosa, materijalnih i drugih razloga nisu u mogućnosti da mu osiguraju normalne uvjete za pravilan odgoj, fizički i psihički razvoj.

Član 13.

Lica sa invaliditetom i lica ometena u fizičkom i psihičkom razvoju, u smislu člana 11. stav (1) tačka e) ovog zakona, su djeca i odrasla lica, koja su:

- a) slijepa i slabovidna,
- b) gluha i nagluha,
- c) sa poremećajem u govoru i glasu,
- d) sa tjelesnim oštećenjima i trajnim smetnjama u fizičkom razvoju,
- e) sa smetnjama u psihičkom razvoju (lahkog, umjerenog, teškog i teškog stepena),
- f) sa kombiniranim smetnjama (višestruko ometena u razvoju).

Član 14.

Materijalno neosigurano i za rad nesposobno lice, u smislu člana 11. stav (1) tačka f) ovog zakona, je odraslo lice, koje nema prijeko potrebnih sredstava za izdržavanje, nesposobno je za rad i ne može osigurati sredstva za život po nekom drugom osnovu.

Član 15.

Starim licem bez porodičnog staranja, u smislu člana 11. stav (1) tačka g) ovog zakona, smatra se lice starije od 65 godina (muškarac), odnosno 60 godina (žena), koje nema članove porodice ni srodnike koji su po zakonu obavezni da ga izdržavaju, ili ako ih ima, ta lica nisu u mogućnosti da izvršavaju obavezu izdržavanja.

Član 16.

Lice sa društveno negativnim ponašanjem, u smislu člana 11. stav (1) tačka h) ovog zakona, je lice koje se odaje besposličarenju, skitnji, prosjačenju, prostituciji, alkoholizmu i drugim oblicima društveno negativnog ponašanja, a registrovano je kao lice sa društveno negativnim ponašanjem i kao takvo uključeno u tretman socijalne rehabilitacije.

Član 17.

Lice ovisno o psihoaktivnim supstancama, u smislu čla-

na 11. stav (1) tačka i) ovog zakona, je lice registrovano kao lice ovisno o psihoaktivnim supstancama u nadležnoj kantonalnoj ustanovi, a koje je uključeno u tretman socijalne rehabilitacije, resocijalizacije i reintegracije koji se bez društvene pomoći uspješno ne može okončati.

Član 18.

- (1) Lice, odnosno porodica u stanju socijalne potrebe, kojima je usljed posebnih okolnosti potreban odgovarajući oblik socijalne zaštite, u smislu člana 11. stav (1) tačka j) ovog zakona, smatra se lice, odnosno porodica koja se nađe u stanju socijalne potrebe zbog pretrpljene prisilne migracije, repatrijacije, elementarne nepogode, smrti jednog ili više članova porodice, povratka sa liječenja, otpuštanja sa izdržavanja kazne zatvora ili izvršavanja odgojne mjere.
- (2) Licima i porodicama u stanju socijalne potrebe koji ispunjavaju uvjete za sticanje i ostvarivanje prava iz socijalne zaštite, iz člana 19. ovog zakona, obezbjeđuje se zdravstveno osiguranje i ostvarivanje osnovne zdravstvene zaštite, ukoliko nisu zdravstveno osigurani po drugom osnovu, kao i zadovoljavanje drugih potreba, u skladu sa mogućnostima Kantona, odnosno općine, a prema Uputstvu koje donosi ministar Ministarstva za rad, socijalnu politiku i izbjeglice (u daljem tekstu: Ministar).

POGLAVLJE II. PRAVA IZ SOCIJALNE ZAŠTITE

Član 19.

Prava iz socijalne zaštite, u smislu ovog zakona su:

- a) novčana i druga materijalna pomoć;
- b) osposobljavanje za život i rad;
- c) smještaj u drugu porodicu;
- d) smještaj u ustanove socijalne zaštite;
- e) usluge socijalnog i drugog stručnog rada;
- f) kućna njega i pomoć u kući;
- g) vršenje starateljstva i nadzor.

Odjeljak A. Novčana i druga materijalna pomoć

Član 20.

Novčana i druga materijalna pomoć sastoji se od:

- a) stalne novčane pomoći;
- b) novčane naknade za pomoć i njegu od strane drugog lica;
- c) druge materijalne pomoći.

Član 21.

Pravo na stalnu novčanu pomoć imaju lica i porodice, pod sljedećim, uvjetima:

- a) da su nesposobni za rad, odnosno spriječeni u ostvarivanju prava na rad,
- b) da nemaju dovoljno prihoda za izdržavanje,
- c) da nemaju članova porodice koji su po zakonu obavezni da ih izdržavaju ili ako ih imaju, da ta lica nisu u mogućnosti da izvršavaju obavezu izdržavanja.

Član 22.

Nesposobnim za rad, odnosno spriječenim u ostvarivanju prava na rad, u smislu ovog zakona, smatra se lice:

- a) potpuno nesposobno za samostalan rad i privređivanje,
- b) lice starije od 65 godina (muškarac), odnosno 60 godina (žena),
- c) žena za vrijeme trudnoće, porođaja i poslije porođaja, u skladu sa propisima o radu,
- d) roditelj, očuh, maćeha ili usvojilac koji se stara o jednom ili više djece do jedne godine života, a nema članova porodice ni srodnike koji su po zakonu obavezni da ga izdržavaju ili ako ih ima, da ta lica nisu u mogućnosti da izvršavaju obavezu izdržavanja,
- e) dijete do navršene 15 godine života, a ako je na redovnom školovanju do navršene 27 godine života,
- f) lice sa trajnim smetnjama u fizičkom i psihičkom razvoju,
- g) lice koje u porodici njeguje lice sa invaliditetom ili teško oboljelo lice, ukoliko je utvrđeno da je tom licu prijeko potrebna pomoć i njega od strane drugog lica.

Član 23.

- (1) Nalaz i mišljenje o nesposobnosti za rad lica iz člana 22. tačka a) ovog zakona u prvom i drugom stepenu daje Institut za medicinsko vještačenje Federacije BiH (u daljem tekstu: Institut).
- (2) Nalaz i mišljenje o sposobnosti i razvrstavanju djeteta ometenog u fizičkom ili psihičkom razvoju daje, u prvom stepenu stručna komisija za ocjenjivanje sposobnosti i razvrstavanje djece ometene u fizičkom ili psihičkom razvoju, koju obrazuje nadležni organ općine, a u drugom stepenu stručna komisija koju obrazuje Ministarstvo za rad, socijalnu politiku i izbjeglice Zeničko-dobojskog kantona (u daljem tekstu: Ministarstvo).
- (3) Dvije ili više općina mogu se sporazumjeti da zajednički obrazuju prvostepenu komisiju iz stava (2) ovog člana.
- (4) Pravilnik o otkrivanju, ocjenjivanju sposobnosti, razvrstavanju i evidenciji djece ometene u fizičkom ili psihičkom razvoju donijet će Ministar.

Član 24.

- (1) Ukupan prihod domaćinstva čine prihodi koje članovi domaćinstva ostvaruju po osnovu:
 - a) plaća i drugih primanja iz radnog odnosa;
 - b) starosne, invalidske i porodične penzije;
 - c) poljoprivredne djelatnosti;
 - d) primanja po propisima o boračko-invalidskoj zaštiti i zaštiti civilnih žrtava rata;
 - e) prihoda ostvarenih po osnovu imovinskog prava;
 - f) prihoda ostvarenih po osnovu privredne, uslužne i druge djelatnosti;
 - g) dopunskog rada;
 - h) i drugih primanja.
- (2) Prihodom od poljoprivredne djelatnosti u smislu tačke (c) stava (1) ovog člana smatra se katastarski prihod iz prethodne godine, uvećan dva puta.
- (3) Prihodom u smislu stava (1) ovog člana ne smatraju se: novčane naknade po osnovu prava lica sa invaliditetom, dodatak na djecu, stipendije, krediti učenika i studenata, alimentacije i jednokratne pomoći.

Član 25.

- (1) Smatra se da lice nema dovoljno prihoda za izdržavanje ako ukupan prihod po članu domaćinstva mjesečno ne prelazi 10% od prosječne plaće Kantona.
- (2) Pravo na materijalnu pomoć, osim uvjeta propisanih ovim zakonom ne može ostvariti lice koje je vlasnik, odnosno posjednik nekretnina (kuće, stana i druge nekretnine) koja svojom veličinom prelazi potrebu domaćinstva, odnosno čijom bi se prodajom ili davanjem u zakup mogla ostvariti sredstva potrebna za izdržavanje, te bi se po osnovu te imovine izdržavanje moglo obezbjediti ugovorom o doživotnom izdržavanju, što u svakom konkretnom slučaju procjenjuje Centar za socijalni rad, odnosno nadležna općinska služba za upravu (u daljem tekstu: općinski prvostepeni organ).
- (3) Posjedovanje nekretnine (kuće ili stana) nije smetnja za ostvarivanje prava na materijalnu pomoć, pod uvjetom da veličina kuće ili stana ne prelazi 40 m² stambenog prostora za jednočlano domaćinstvo, odnosno dodatnih 5 m² za svakog sljedećeg člana.
- (4) Lica ili domaćinstva koja su ostvarila sredstva prodajom imovine ili su svoju imovinu darovala, nemaju pravo na materijalnu pomoć za vremenski period u kojem iznos pomoći odgovora visini cijene postignute prodajom, odnosno darovanjem imovine.
- (5) Prava na materijalnu pomoć ne mogu ostvariti domaćinstva u kojima je jedan od članova vlasnik preduzeća ili samostalne radnje ili ima registrovanu dopunsku djelatnost, odnosno domaćinstva u kojima su jedan ili više članova vlasnici ili posjednici automobila.

Član 26.

- (1) Obaveza izdržavanja između članova porodice utvrđuje se i primjenjuje u skladu sa odredbama Porodičnog zakona Federacije Bosne i Hercegovine („Službene novine Federacije BiH“, broj: 35/05 i 41/05), (u daljem tekstu: Porodični zakon).
- (2) Smatra se da član porodice nije u mogućnosti da izvršava obavezu izdržavanja ukoliko mu prihodi po članu njegovog domaćinstva mjesečno ne prelaze iznos od 20% od prosječne plaće Kantona.

Član 27.

- (1) Visina stalne novčane pomoći iz člana 20. ovog zakona, utvrđuje se za jednočlano i dvočlano domaćinstvo u iznosu od 17% od prosječne plaće Kantona, koji se za svakog sljedećeg člana domaćinstva uvećava za 10% od ovog iznosa.
- (2) Utvrđena visina stalne novčane pomoći ne može biti veća od 23% od iznosa prosječne plaće Kantona.

Član 28.

- (1) Stalna novčana pomoć pripada samo jednom članu porodičnog domaćinstva, kao korisniku pomoći.
- (2) Kada više članova domaćinstva ispunjava uvjete za sticanje prava na stalnu novčanu pomoć, stalna novčana pomoć utvrđuje se u ime porodičnog domaćinstva onom članu domaćinstva koji ima najpovoljnije uvjete za sticanje ovog prava.

Član 29.

Općina može propisati i povoljnije uvjete za sticanje prava na novčanu i drugu materijalnu pomoć utvrđenu ovim zakonom, a u skladu sa svojim programima, odnosno planovima razvoja socijalne zaštite i svojim budžetskim mogućnostima.

Član 30.

- (1) Pravo na novčanu naknadu za pomoć i njegu od strane drugog lica (u daljem tekstu: novčana naknada) ostvaruju stara i nemoćna lica, pod uvjetom da im je zbog trajnih promjena u zdravstvenom stanju, prijeko potrebna pomoć i njega od strane drugog lica za zadovoljenje njihovih osnovnih životnih potreba.
- (2) Starim licem, u smislu ovog zakona, smatra se lice starije od 65. godina (muškarac), odnosno 60 godina (žena).
- (3) Potrebu za pomoć i njegu od strane drugog lica svojim nalazom, ocjenom i mišljenjem utvrđuje Kantonalni zavod za medicinu rada.

- (4) Pravilnik o postupku ocjenjivanja stanja osoba kojima je potrebna pomoć i njega od strane drugog lica, donijet će Ministar.
- (5) Lice sa invaliditetom i lice ometeno u fizičkom ili psihičkom razvoju, pravo iz stava (1) ovog člana, ostvaruje shodno Zakonu o osnovama socijalne zaštite, zaštite civilnih žrtava rata i zaštite porodice sa djecom («Službene novine Federacije BiH», broj: 36/99, 54/04 i 39/06), (u daljem tekstu: Federalni zakon).

Član 31.

Lice iz člana 30. stav (1) ostvaruje pravo na novčanu naknadu uz ispunjavanje i slijedećih uvjeta:

- a) Da lice nije smješteno u socijalno-medicinsku ili drugu ustanovu,
- b) Da prihod domaćinstva mjesečno ne prelazi 50% od prosječne plaće Kantona, bez obzira na broj članova domaćinstva,
- c) Da lice ne ostvaruje pravo na kućnu njegu i pomoć u kući,
- d) Da se ovo pravo ne može ostvariti po nekom drugom osnovu,
- e) Da lice ima prebivalište, odnosno boravište na području Kantona.

Član 32.

Visina novčane naknade utvrđuje se u iznosima kako slijedi:

- a) 30,00 KM za staro i nemoćno lice koje može uz upotrebu ortopedskih ili protetičkih pomagala da vrši pokrete tijela neophodne za samostalno zadovoljavanje osnovnih životnih potreba,
- b) 50,00 KM za staro i nemoćno lice koje ni uz korištenje ortopedskih ili protetičkih pomagala ne može da vrši pokrete tijela neophodne za samostalno zadovoljavanje osnovnih životnih potreba.

Član 33.

Druga materijalna pomoć, u smislu ovog zakona je privremena, jednokratna, druga novčana pomoć ili prirodno davanje materijalno neosiguranom licu ili porodici koja se nađe u stanju socijalne potrebe zbog: pretrpljene prisilne migracije, repatrijacije, smrti jednog ili više članova porodice, liječenja, odlaska i povratka sa liječenja, otpuštanja sa izdržavanja kazne zatvora, izvršavanja odgojne mjere, elementarne nepogode, iznenadnih nesretnih događaja u porodici i drugih okolnosti koje uzrokuju stanje socijalne potrebe.

Član 34.

Pravo na drugu materijalnu pomoć imaju lica i porodice pod sljedećim uvjetima:

- a) da nemaju dovoljno prihoda za izdržavanje u smislu člana 25. ovog zakona,
- b) da nemaju članova porodice koji su po zakonu obavezni da ih izdržavaju ili ako ih imaju, da ta lica nisu u mogućnosti da izvršavaju obavezu izdržavanja.

Član 35.

- (1) Privremena novčana pomoć može se dodijeliti licu koje se nađe u stanju izuzetne socijalne potrebe, koja se ne može zadovoljiti jednokratnom novčanom pomoći.
- (2) Visina privremene novčane pomoći utvrđuje se u iznosu od 100,00 do 300,00 KM, a može se dodijeliti istom licu samo jedanput u toku kalendarske godine.
- (3) Odluku o dodjeli pomoći iz stava (2) ovog člana, donosi općinski prvostepeni organ.

Član 36.

- (1) Jednokratna novčana pomoć može se odobriti licu u stanju socijalne potrebe uzrokovane okolnostima navedenim u članu 33. ovog zakona.
- (2) Jednokratna novčana pomoć može se odobriti u iznosu do 200,00 KM, a istom licu se može odobriti najviše dva puta, u toku kalendarske godine.
- (3) Odluku o dodjeli jednokratne novčane pomoći donosi općinski prvostepeni organ.

Član 37.

- (1) Pravo na materijalnu pomoć u vidu naturalne pomoći mogu ostvariti lica i porodice koje se nađu u stanju socijalne potrebe, iz razloga navedenih u članu 33. ovog zakona.
- (2) Zavisno od mogućnosti Kantona, odnosno općine, pravo na pomoć iz stava (1) ovog člana, može se ostvariti, neovisno od već ostvarenog prava na stalnu, odnosno privremenu ili jednokratnu novčanu pomoć.

Član 38.

- (1) Porodica, korisnika stalne novčane pomoći, ima pravo na novčanu pomoć za potrebe snošenja troškova dženaze – sahrane – pokopa korisnika stalne novčane pomoći.
- (2) Visinu pomoći iz stava (1) ovog člana, kao i način realizacije, propisuje općina.

Odjeljak B. Pravo na osposobljavanje za život i rad**Član 39.**

- (1) Pravo na osposobljavanje za život i rad ostvaruje dijete ometeno u psiho-fizičkom razvoju do navršanih 15 godina života kroz osnovno obrazovanje i odgoj u ustanovama namijenjenim djeci sa smetnjama u psiho-fizičkom razvoju ili u posebnim odgojnim grupama u odgovarajućim ustanovama za osnovno obrazovanje.
- (2) Izuzetno od stava (1) ovog člana, pravo na osposobljavanje za život i rad ostvaruje dijete do navršanih 18 godina života, ukoliko zbog psiho-fizičkih sposobnosti nije bilo u stanju završiti osposobljavanje za samostalan život i rad u predviđenom roku.

Član 40.

- (1) Dijete ometeno u psiho-fizičkom razvoju sa navršanih 15, odnosno 18 godina života, ostvaruje pravo na osposobljavanje za samostalan život i rad u srednjoj školi u kojoj se ostvaruju stručni, posebno prilagođeni programi za obrazovanje djece sa smetnjama u fizičkom ili psihičkom razvoju, ako su ispunjeni sljedeći uvjeti:
 - a) da postoji vjerovatnoća da se dijete s obzirom na prirodu uzroka i stepen preostale sposobnosti za rad, može primjenom ovog prava osposobiti za samostalan život i rad,
 - b) da je dijete završilo osnovno obrazovanje i odgoj u ustanovama namijenjenim djeci i odraslim licima sa smetnjama u psiho-fizičkom razvoju ili u posebnim odgojnim grupama u odgovarajućim ustanovama za osnovno obrazovanje,
 - c) da postoji vjerovatnoća da se osposobljavanje djeteta, s obzirom na psihičku razvijenost i druga lična svojstva, može postići u roku od najviše četiri godine.
- (2) Izuzetno, pravo na osposobljavanje za život i rad obezbjeđuje se i djetetu do navršene 21. godine života, odnosno i poslije navršene 21. godine života, ukoliko je to pravo uspostavljeno do navršene 21. godine života.

Član 41.

- (1) Utvrđivanje postojanja osnova za ostvarivanje prava na osposobljavanje za život i rad vrši stručna komisija iz člana 23. stav (2) ovog zakona.
- (2) Postupak za utvrđivanje činjenica iz stava (1) ovog člana, način rada stručne komisije, način ostvarivanja saradnje sa drugim učesnicima u postupku, ocjenjivanje radne sposobnosti, medicinska i druga dokumentacija potrebna za ocjenjivanje radne sposobnosti, sadržaj nalaza, ocjene i mišljenja, obrasci koji se upotrebljavaju i druga pitanja od značaja za ostvarivanje

ovih prava, regulisat će se pravilnikom koji donosi Ministar.

Član 42.

Lice, koje se radi osposobljavanja za samostalan život i rad upućuje izvan mjesta prebivališta, odnosno boravišta, ima pravo na:

- a) Pokriće troškova smještaja i prehrane, a povodom pohađanja osnovne i srednje škole i troškova internatskog smještaja u ili preko odgovarajućeg zavoda ili centra;
- b) Pokriće troškova smještaja i prehrane u drugoj porodici, a povodom pohađanja osnovne i srednje škole i obezbjeđenja porodičnog smještaja koji se ugovorno reguliše između općinskog prvostepenog organa i odgovarajuće porodice;
- c) Pokriće troškova prijevoza do obrazovne institucije u visini cijene mjesečne vozne karte za prijevoz autobusom u javnom saobraćaju, odnosno drugim razredom željeznice, ukoliko se ne nalazi na internatskom ili porodičnom smještaju.

Član 43.

- (1) U troškovima osposobljavanja za život i rad učestvuju roditelji, usvojitelji, staratelji i srodnici, ukoliko im mjesečni prihodi po članu domaćinstva prelaze 15% od prosječne plaće Kantona.
- (2) Lice, iz stava (1) ovog člana, učestvuje u snošenju dijela troškova smještaja, prehrane i prijevoza lica koje se osposobljava, i to u iznosu od 100% pripadajućeg dijela prihoda lica koje se osposobljava za život i rad.

Član 44.

Troškovi smještaja i prehrane lica iz člana 42. stav (1) tačka b) ovog zakona, ne mogu biti veći od 80% od troškova smještaja i prehrane u odgovarajućoj ustanovi internatskog tipa.

Odjeljak C. Smještaj u drugu porodicu

Član 45.

- (1) Smještaj u drugu porodicu može ostvariti dijete i odraslo lice, kojem je potrebna stalna briga i pomoć radi zadovoljavanja njegovih životnih potreba, a koje ne može ostvariti u krugu vlastite porodice ili na drugi način, pod uvjetima i na način utvrđen ovim i Federalnim zakonom.
- (2) Smještajem u drugu porodicu ne smatra se smještaj, odnosno zbrinjavanje i briga o djeci od strane članova

porodice, iz člana 4. stav (1) ovog zakona.

- (3) Preuzimanje potrebne stalne brige i pomoći o djeci od strane članova porodice iz člana 4. stav (1) ovog zakona, radi zadovoljavanja njihovih životnih potreba, koje ne mogu ostvariti u krugu vlastite porodice ili na drugi način, smatra se srodničkim porodičnim smještajem (u daljem tekstu: srodnički smještaj).

Član 46.

- (1) Pravo na smještaj u drugu porodicu imaju:
 - a) dijete iz člana 11. stav (1) tačka a) do d) ovog zakona, do povratka u vlastitu porodicu, odnosno do završetka redovnog školovanja, a najduže 12 mjeseci po završetku redovnog školovanja,
 - b) lica iz člana 11. stav (1) tačka e) do h), koja nisu u mogućnosti da se sama staraju o sebi, a usljed stambenih ili porodičnih prilika nemaju mogućnosti da im se zaštita osigura na drugi način,
 - c) žena iz člana 22. stav (1) tačka c) ovog zakona i samohrani roditelj do godinu dana života djeteta, ukoliko nema sredstva za izdržavanje ili kojem je, usljed neriješenog stambenog pitanja ili poremećaja porodičnih odnosa, potreban privremeni smještaj.
- (2) Djetetu iz stava (1) tačka a) ovog člana, po završetku redovnog školovanja, organ starateljstva je dužan osigurati zbrinjavanje na drugi način.
- (3) Samohranim roditeljem, u smislu stava (1) tačka c) ovog člana, smatra se roditelj koji nije u braku i ne živi u vanbračnoj zajednici, a sam izdržava svoje dijete.

Član 47.

Član porodice u kojoj je lice smješteno i koje preuzme brigu o tom licu (u daljem tekstu: hranitelj), mora biti duševno i tjelesno zdrav i imati stambene i druge uvjete potrebne za zaštitu, čuvanje, njegu, ishranu, učenje i zadovoljavanje drugih potreba i interesa tog lica.

Član 48.

Lice se ne može smjestiti u drugu porodicu:

- a) u kojoj je jednom od bračnih drugova oduzeta ili ograničena poslovna sposobnost,
- b) u kojoj je jedan od bračnih drugova lišen roditeljskog staranja,
- c) u kojoj su poremećeni porodični odnosi,
- d) u kojoj su neki članovi lica sa društveno negativnim ponašanjem,
- e) u kojoj bi, zbog bolesti nekog člana porodice, bilo ugroženo zdravlje smještenog lica.

Član 49.

- (1) Za smještaj djeteta u drugu porodicu potrebna je pismena saglasnost roditelja, odnosno usvojitelja ili staratelja, a mišljenje djeteta uzeće se u obzir u skladu sa njegovim uzrastom i zrelosti.
- (2) Saglasnost roditelja nije potrebna, ako su roditelji sa društveno negativnim ponašanjem, ili su kroz duži period grubo zanemarili svoje roditeljske obaveze ili ako su roditelji lišeni roditeljskog staranja.

Član 50.

- (1) Porodica u kojoj je dijete smješteno, ne može preduzimati, bez saglasnosti roditelja, usvojitelja ili organa starateljstva, važnije mjere u pogledu ličnosti djeteta, a naročito predati ga nekom drugom licu na čuvanje i njegu, prekinuti školovanje, promijeniti vrstu škole, odlučiti o izboru ili obavljanju zanimanja i zaključivanja ugovora o radu, u smislu propisa o radu.
- (2) Saglasnost roditelja sa društveno negativnim ponašanjem, roditelja koji su kroz duži period zanemarili svoje roditeljske obaveze i roditelja lišenih roditeljskog staranja, nije potrebna za radnje, utvrđene stavom (1) ovog člana.

Član 51.

- (1) Smještaj u drugu porodicu prestaje:
 - a) sporazumom ugovornih strana,
 - b) istekom ugovora,
 - c) raskidom ugovora,
 - d) otkazom ugovora,
 - e) punoljetstvom djeteta,
 - f) usvojenjem djeteta,
 - g) smrću lica koje je zaključilo ugovor,
 - h) smrću lica na smještaju.
- (2) Izuzetno, smještaj u drugu porodicu može se produžiti i nakon punoljetstva djeteta do završetka redovnog školovanja, a najkasnije do navršene 27. godine života, ukoliko općinski prvostepeni organ smatra takvo produženje opravdanim.

Član 52.

- (1) Hranitelj ima pravo na naknadu za smještaj.
- (2) Visina naknade iz stava (1) ovog člana iznosi:
 - a) 30% od prosječne plaće Kantona, za smještaj djece i odraslih lica;
 - b) 40% od prosječne plaće Kantona, za smještaj djece i odraslih lica sa psiho-fizičkim poremećajima i smetnjama.
- (3) Naknada iz stava (1) ovog člana, ne smatra se plaćom niti drugim prihodom koji podliježe plaćanju poreza.

- (4) U slučaju srodnickog smještaja, srodniku kao prihvatitelju, odnosno hranitelju, pripada pravo na novčanu pomoć u iznosu od 22%, od prosječne plaće Kantona, po svakom djetetu mjesečno, a koja se usklađuje jednom godišnje.

Član 53.

- (1) Na osnovu rješenja o određivanju smještaja u drugu porodicu općinski prvostepeni organ zaključuje pismeni ugovor o smještaju sa hraniteljem.
- (2) Ugovorom iz stava (1) ovog člana, uređuju se međusobni odnosi između općinskog prvostepenog organa i hranitelja, a naročito: uvjeti i rok otkazivanja ugovora, visina, način isplate naknade za smještaj lica, obaveza isplate naknade i druga pitanja od značaja za korisnika ovog oblika zaštite.

Član 54.

- (1) Troškove smještaja u drugu porodicu snosi lice koje se smješta u drugu porodicu, roditelj, usvojitelj, staratelj ili srodnik koji je dužan da izdržava to lice, ili drugo pravno ili fizičko lice koje je preuzelo obavezu snošenja troškova smještaja.
- (2) Troškove smještaja snose ili u njihovom snošenju učestvuju: lice koje se smješta, roditelji, usvojitelji, staratelji ili srodnici, koji su shodno zakonu dužni izdržavati to lice, ukoliko im mjesečni prihodi po članu domaćinstva prelaze 15% od prosječne plaće Kantona.
- (3) Lice iz stava (2) ovog člana snosi troškove smještaja u visini od 100% pripadajućeg dijela prihoda lica koje se smješta u drugu porodicu.
- (4) Ukoliko sredstva iz stava (2) ovog člana nisu dovoljna za izmirenje troškova smještaja, razliku do punog iznosa cijene smještaja snosi Kanton.

Odjeljak D. Smještaj u ustanovu socijalne zaštite**Član 55.**

- (1) Smještaj u ustanovu socijalne zaštite (u daljem tekstu: Ustanova) može ostvariti dijete i odraslo lice kojem je potrebna stalna briga i pomoć u zadovoljavanju njihovih životnih potreba, a ne može ih ostvariti u vlastitoj porodici ili drugoj porodici ili na drugi način, a pod uvjetima i na način predviđen ovim i Federalnim zakonom.
- (2) Smještaj u Ustanovu može ostvariti i lice ovisno o psihoaktivnim supstancama pod uvjetima:
 - a) da je registrovano kao ovisnik o psihoaktivnim supstancama;
 - b) da se dobrovoljno uključilo u tretman socijalne rehabilitacije, resocijalizacije i reintegracije;

- c) da u potpunosti saraduje u trajanju tretmana;
- d) da se nalazi u stanju socijalne potrebe;
- e) da ima preporuku za smještaj u Ustanovu, odnosno odgovarajuću organizaciju, od kantonalne ustanove za borbu protiv bolesti ovisnosti u kojoj je registrovano, ovjerenu od stručnog tima takve ustanove (socijalni radnik, psihijatar i psiholog).

Član 56.

- (1) Troškove smještaja u Ustanovu snosi ili u njihovom snošenju učestvuju fizičko i pravno lice, na način propisan članom 54. ovog zakona.
- (2) Sredstva od učešća fizičkog lica u snošenju dijela troškova smještaja u Ustanovi, uplaćuju se na račun Ustanove koja je dužna prilikom naplate svojih usluga u računu prikazati učešće tog lica.

Član 57.

- (1) Međusobni odnosi Ministarstva i Ustanova regulišu se ugovorom, sa svakom Ustanovom posebno.
- (2) Ugovorom se reguliše način plaćanja usluga, pitanja od značaja za zaštitu štitenika, obaveza Ustanove prema Ministarstvu, općinskom prvostepenom organu i druga pitanja od značaja za zaštitu štitenika.

Član 58.

- (1) Odraslo lice, čiji prihodi i novčana sredstva nisu dovoljni za snošenje troškova smještaja, dužno je u svrhu plaćanja iskoristiti svoju imovinu, koja ne služi članovima njegove porodice za podmirenje osnovnih stambenih i drugih osnovnih životnih potreba, o čemu se zaključuje ugovor između korisnika ili roditelja, staratelja, odnosno srodnika koji je u skladu sa zakonom dužan da ga izdržava, općinskog prvostepenog organa i Ustanove.
- (2) Odraslo lice smješteno u Ustanovu, dužno je plaćati cijenu smještaja svim svojim приходima i novčanim sredstvima.
- (3) Ako sredstva, iz stava (1) i (2) ovog člana, nisu dovoljna za plaćanje smještaja, razlika između cijene smještaja i tih sredstava tereti sredstva Kantona.
- (4) Pri utvrđivanju prihoda, iz stava (1) i (2) ovog člana, iznos prihoda umanjuje se za obavezu korisnika za izdržavanje nekog od članova porodice i za iznos namijenjen ličnim potrebama korisnika smještaja.

Član 59.

- (1) Ugovorom, iz člana 58. stav (1), utvrdit će se da, ukoliko korisnik koji je vlasnik pokretne ili nepokretne imovine, nije u mogućnosti da plaća troškove smještaja, ili lica, koja su po zakonu obavezna da ga izdržavaju,

odbiju da plaćaju troškove smještaja ili ne uplaćuju ugovorenu cijenu smještaja, općinski prvostepeni organ može troškove namiriti iz njegove imovine, koju može izdati u zakup, prodati ili na drugi način staviti u promet.

- (2) Saglasnost na ugovor, iz stava (1) ovog člana, daje Ministarstvo.

Član 60.

- (1) U slučaju smještaja u Ustanovu lica koje nema članova porodice, ni srodnike koje je dužan izdržavati, odnosno koji su njega dužni izdržavati, način ustupanja imovine općinskom prvostepenom organu regulisat će se ugovorom.
- (2) Lice koje se smješta i općinski prvostepeni organ, ugovorno regulišu odnose iz stava (1) ovog člana.

Član 61.

- (1) Ako se radi o korisniku penzije smještenom u Ustanovu, koji nema obaveze izdržavanja članova užeg porodičnog domaćinstva, sredstva penzije se uplaćuju na račun Ustanove u koju je lice smješteno.
- (2) Licu iz stava (1) ovog člana, na ime zadovoljavanja ličnih potreba, mjesečno pripada 20% iznosa od penzije.
- (3) Ustanova je dužna prilikom naplate svojih usluga u računu prikazati učešće lica iz stava (1) ovog člana.

Odjeljak E. Usluge socijalnog i drugog stručnog rada

Član 62.

- (1) Socijalni rad, u smislu ovog zakona, je stručna i znanstveno utemeljena djelatnost na preduzimanju mjera i akcija u cilju preventivnog djelovanja, tj. sprečavanja pojava socijalnih problema u lokalnoj zajednici, grupi i kod pojedinca, kao i rješavanje stanja socijalne potrebe pojedinca, grupe i zajednice, uz njihovo puno angažovanje, kada im je pomoć potrebna.
- (2) Drugi stručni rad je stručna i znanstveno utemeljena aktivnost, odnosno, rad koji je u funkciji i od značaja za ostvarivanje ukupnih rezultata i kvaliteta socijalnog rada.

Član 63.

Zadacima socijalnog rada, u smislu ovog zakona, smatraju se:

- a) istraživanje socijalnih problema i pojava;
- b) planiranje širih i sveobuhvatnih mjera;
- c) iniciranje programa mjera za pojedine akcije;
- d) razvijanje preventivnog rada u cilju smanjenja potreba za pružanjem neposredne pomoći;

- e) koordinacija i saradnja u rješavanju socijalnih problema;
- f) pružanje pomoći grupama i pojedincima, kada nisu u stanju da sami riješe svoje probleme.

Član 64.

- (1) Socijalni i drugi stručni rad, u smislu ovog zakona, zasniva se na principima socijalnog rada koji podrazumijevaju osnovne zahtjeve, smjernice, odnosno obavezna načela, kojima se rukovode Ustanove i općinski prvostepeni organi u postupku davanja usluga socijalnog i drugog stručnog rada.
- (2) Osnovni principi socijalnog i drugog stručnog rada, iz stava (1) ovog zakona, su:
 - a) princip naučnosti;
 - b) princip sveobuhvatnosti, odnosno svestranosti;
 - c) princip jedinstva i akcije;
 - d) princip realnosti;
 - e) princip blagovremenosti;
 - f) princip poštivanja ličnosti i dostojanstva klijenta;
 - g) princip pomoći do samopomoći;
 - h) princip čuvanja profesionalne tajne;
 - i) princip jedinstva individualnog, grupnog i rada u zajednici i
 - j) princip individualnog pristupanja klijentu u rješavanju stanja socijalne potrebe.

Član 65.

- (1) Socijalni radnici i drugi stručni zaposlenici, obavezni su svoj rad obavljati u skladu sa zadacima, principima i metodama socijalnog rada i etikom svoje struke, uz poštivanje privatnosti korisnika usluga, njegovog dostojanstva i nepovredivosti njegovog ličnog i porodičnog života.
- (2) Stručni zaposlenici, iz stava (1) ovog člana, obavezni su čuvati, kao profesionalnu tajnu, sve što saznaju o ličnom i porodičnom životu korisnika.
- (3) Na čuvanje profesionalne tajne, obavezni su socijalni i drugi stručni zaposlenici svih Ustanova socijalne zaštite i nadležnih općinskih službi.
- (4) Socijalni radnici i drugi stručni zaposlenici Ustanova i nadležnih općinskih službi, svoj službeni status, identitet i ovlaštenje dokazuju iskaznicom. Sadržaj i formu iskaznice, propisuje Ministar.
- (5) Povreda čuvanja profesionalne tajne predstavlja težu povredu obaveza iz radnog odnosa.

Član 66.

- (1) Pravo na usluge socijalnog i drugog stručnog rada mogu ostvariti pojedinci, porodice i društvene grupe, neovisno od materijalnih mogućnosti i korištenja nekog

od oblika socijalne zaštite, radi zaštite njihovih prava i interesa i sprečavanja pojava i ublažavanja posljedica socijalnih problema.

- (2) Uslugama socijalnog i drugog stručnog rada, u smislu ovog zakona, smatra se savjetodavni rad koji obavljaju Ustanove u rješavanju porodičnih i bračnih problema, te mjere i akcije u saradnji sa mjesnim zajednicama i drugim organima na suzbijanju i sprečavanju društveno neprihvatljivog ponašanja djece i ostalih pojedinaca, porodica i društvenih grupa.

Odjeljak F. Kućna njega i pomoć u kući

Član 67.

- (1) Pravo na kućnu njegu i pomoć u kući ostvaruje lice potpuno nesposobno za samostalan rad i privređivanje, lice starije od 65 godina (muškarac), odnosno 60 godina (žena) i lice sa trajnim smetnjama u fizičkom i psihičkom razvoju, koje nije u stanju da se samo stara o sebi, pod uvjetima da to lice:
 - a) ne ostvaruje pravo na novčanu naknadu za pomoć i njegu od strane drugog lica shodno ovom i Federalnom zakonu,
 - b) nema mogućnosti da mu kućnu njegu i pomoć u kući osiguraju roditelji, bračni drug i djeca,
 - c) nema mogućnost da mu se kućna njega i pomoć u kući osigura na osnovu ugovora o doživotnom izdržavanju i
 - d) čiji prihod po članu domaćinstva ne prelazi iznos 40% od prosječne plaće Kantona.
- (2) Pravo na kućnu njegu i pomoć u kući, pod uvjetima iz stava (1) ovog člana, ima i lice kojem je zbog privremenih promjena u zdravstvenom stanju ili tjelesnog oštećenja, neophodno potrebna kućna njega i pomoć u kući, zbog nemogućnosti vlastitog staranja o sebi.

Član 68.

Kućna njega i pomoć u kući obuhvata:

- a) organizovanje prehrane (nabavka i dostava gotovih obroka u kuću, odnosno nabavka živežnih namirnica, pomoć u pripremi obroka, pranje posuđa i dr.),
- b) obavljanje kućnih poslova (pospremanje stana, donošenje vode, ogrjeva i slično, organizovanje pranja i peglanja rublja, nabavka lijekova i drugih potrepština),
- c) održavanje lične higijene (pomoć u oblačenju i svlačenju, u kupanju i obavljanju drugih higijenskih potreba),
- d) zadovoljavanje drugih svakodnevnih potreba.

Član 69.

- (1) Kućnu njegu i pomoć u kući obezbjeđuje općinski prvostepeni organ, angažovanjem odgovarajuće nevladine organizacije, koja ispunjava uvjete propisane zakonom.
- (2) Sa odgovarajućom nevladinom organizacijom koja neposredno pruža usluge kućne njege i pomoći u kući, ima tradiciju, posjeduje kapacitete i raspolaze sa potrebnom infrastrukturom, općinski prvostepeni organ zaključuje ugovor kojim se preciziraju obim usluga, visina naknade i druga prava i obaveze.

Odjeljak G. Vršenje starateljstva i nadzora**Član 70.**

- (1) Starateljstvo je, u smislu Porodičnog i ovog zakona, oblik zaštite maloljetnih osoba bez roditeljskog staranja i punoljetnih lica koja nisu sposobna, ili koja nisu u mogućnosti starati se o sebi, svojim pravima, interesima i obavezama.
- (2) Poslove starateljstva vrši općinski prvostepeni organ, putem imenovanog staratelja ili neposredno, ako to zahtijeva interes šticećenika i okolnosti slučaja, preko stručnog lica zaposlenog u organu starateljstva.
- (3) Ako se sredstva za isplatu naknade za rad staratelja ne mogu osigurati iz sredstava navedenih u članu 174. stav (2) Porodičnog zakona, njihova će se isplata vršiti u skladu sa pravilnikom koji će donijeti Ministar.

Član 71.

- (1) Nadzor nad ostvarivanjem roditeljskog staranja, u smislu Porodičnog i ovog zakona, općinski prvostepeni organ određuje kada su roditelji zanemarili staranje o zdravlju i odgoju djeteta ili kada je roditeljima potrebna pomoć u odgoju djeteta.
- (2) U odluci o nadzoru, općinski prvostepeni organ utvrdit će program nadzora i odrediti lice koje će pratiti razvoj djeteta, kontrolisati postupke roditelja, podnositi periodične izvještaje općinskom prvostepenom organu i poduzimati druge mjere u interesu djeteta.
- (3) Lice iz stava (2) ovog člana, ima pravo na naknadu opravdanih troškova i mjesečnu naknadu, u skladu sa Pravilnikom o visini i načinu isplate opravdanih troškova i mjesečne naknade, licu koje vrši nadzor nad ostvarivanjem roditeljskog staranja, koji je donio federalni ministar rada i socijalne politike („Službene novine Federacije BiH“, broj: 18/06).
- (4) Naknada, iz stava (3) ovog člana, pada na teret općinskog prvostepenog organa.

Član 72.

Propisom općine može se proširiti krug korisnika i prava iz socijalne zaštite utvrđenih ovim zakonom, u skladu sa programima odnosno sa planovima razvoja socijalne zaštite, specifičnim prilikama i potrebama, a shodno mogućnostima općine.

POGLAVLJE III. OSNIVANJE I RAD USTANOVA SOCIJALNE ZAŠTITE**Član 73.**

- (1) Ustanove pružaju usluge kojima se u cjelini ili djelimično zadovoljavaju socijalne i druge potrebe korisnika socijalne zaštite.
- (2) Ustanove se osnivaju radi zbrinjavanja određenih kategorija korisnika socijalne zaštite i obavljanja stručnih i drugih poslova socijalne zaštite.
- (3) Rad ustanova je javan.
- (4) Javnost se može isključiti u pojedinim postupcima, kada je to utvrđeno propisima o porodičnim odnosima i o krivičnom postupku.
- (5) Ustanove se osnivaju kao:
 - a) centar za socijalni rad,
 - b) ustanova za djecu, i to:
 - 1) za djecu bez roditeljskog staranja,
 - 2) za odgojno zanemarenu i zapuštenu djecu,
 - 3) za djecu ometenu u fizičkom ili psihičkom razvoju – djeca sa posebnim potrebama,
 - c) ustanova za odrasla i stara lica,
 - d) ustanova za socijalno - zdravstveno zbrinjavanje invalidnih i drugih lica,
 - e) ustanova za dnevni boravak korisnika socijalne zaštite,
 - f) druge ustanove zavisno od potreba i mogućnosti općina i Kantona.

Član 74.

- (1) Kantonalne, odnosno općinske Ustanove, u skladu sa ovim i Federalnim zakonom, osniva Kanton, odnosno općina, kao javnu Ustanovu.
- (2) Javna Ustanova ima svojstvo pravnog lica.
- (3) Ustanovu osniva domaće i strano pravno i fizičko lice.
- (4) Ustanove se osnivaju radi:
 - a) obavljanja stručnih i drugih poslova socijalne zaštite,
 - b) zbrinjavanja određenih kategorija korisnika socijalne zaštite,
 - c) proučavanja pojava i problema u oblasti socijalne zaštite.
- (5) Pravilnik o općim, tehničkim i stručnim uvjetima za osnivanje i rad Ustanova, donijet će Ministar.

Član 75.

- (1) Ministar, odnosno općinski načelnik (u daljem tekstu: Načelnik) donosi rješenje o ispunjavanju uvjeta za početak obavljanja djelatnosti Ustanove.
- (2) Kada utvrdi da Ustanova ne ispunjava zakonom propisane uvjete za obavljanje djelatnosti, Ministar, odnosno Načelnik će odrediti rok u kome je Ustanova dužna otkloniti nedostatke.

Član 76.

Ustanova prestaje sa radom u slučajevima utvrđenim općim propisima o ustanovama.

Član 77.

- (1) Ustanove su dužne na propisan način voditi evidenciju o korisnicima i pruženim uslugama i o tome dostavljati izvještaje Ministarstvu.
- (2) Ministar propisuje evidencije iz stava (1) ovog člana.

Član 78.

- (1) Ministarstvo vodi evidenciju o Ustanovama koje obavljaju djelatnost socijalne zaštite.
- (2) Ministar propisuje evidenciju iz stava (1) ovog člana.

Odjeljak A. Centar za socijalni rad**Član 79.**

- (1) Centar za socijalni rad (u daljem tekstu: Centar) je javna ustanova.
- (2) Centar osniva općina radi obavljanja poslova neposredne socijalne zaštite, zaštite civilnih žrtava rata i zaštite porodice sa djecom utvrđenih ovim i Federalnim zakonom, kao i radi obavljanja drugih poslova utvrđenih zakonom, drugim propisima i općim aktima.
- (3) Centar se može osnovati ako zadovoljava kadrovske, odnosno stručne normative kao i minimum smještajnih uvjeta, a što će propisati Ministar.

Član 80.

- (1) Centar na osnovu javnih ovlaštenja:
 - a) daje podatke o porodičnim prilikama, te mišljenja i prijedloge o sudskim postupcima koji se odnose na porodično - pravnu i krivično - pravnu zaštitu,
 - b) sudjeluje kao stranka ili umještač pred sudom i drugim državnim organima, kad se radi o zaštiti ličnih interesa djece i drugih članova porodice, koji se ne mogu brinuti sami o sebi, ni o svojim pravima i interesima,

- c) obavlja nadzor nad porodicama koje su primile na smještaj djecu i odrasla lica.
- (2) Centar može obavljati i poslove zbrinjavanja djece odbjeglije iz porodice i Ustanove, poslove dnevnog zbrinjavanja djece sa posebnim potrebama, provoditi odgojne mjere nad djecom sa poremećajima u ponašanju, izvan vlastite porodice i sa boravkom u porodici, te pružati pomoć i njegu u kući.
- (3) Centar obavlja i druge stručne poslove:
 - a) potiče, organizuje i provodi aktivnosti sa svrhom sprečavanja i suzbijanja socijalnih, porodičnih i ličnih problema,
 - b) prati i proučava probleme iz oblasti socijalne zaštite i vodi stručno analitičke poslove;
 - c) potiče i razvija samopomoć, dobrosusjedsku pomoć, dobrovoljni socijalni rad, dobrotvorne i druge djelatnosti;
 - d) obavlja poslove savjetovališta za probleme braka i porodice, odgoja djece, usvojenja, sudjeluje u aktivnostima od značaja za prevenciju i suzbijanje ovisnosti o alkoholu, drogama, drugim opojnim sredstvima i drugim socijalno patološkim pojavama;
 - e) preduzima mjere od značaja za unaprjeđenje politike socijalne zaštite;
 - f) predlaže, potiče i usklađuje druge aktivnosti u području socijalne zaštite na lokalnom nivou;
 - g) podstiče i organizuje aktivnosti od preventivnog značaja za oblast socijalne zaštite;
 - h) neposredno pruža usluge socijalnog rada;
 - i) obavlja poslove u oblasti porodične zaštite, zaštite civilnih žrtava rata, zaštite porodice sa djecom, zaštite odgojno zanemarene djece, te učestvuje u izvršavanju odgojnih mjera i mjera zaštitnog nadzora;
 - j) pruža savjetodavne usluge i stručnu pomoć pojedincu, porodici i grupama građana;
 - k) saraduje sa građanima, mjesnim zajednicama, državnim organima i ustanovama, pravnim licima, udruženjima građana, pravosudnim organima, policijskim upravama i drugim organima, koji mogu doprinijeti unaprjeđivanju kvaliteta socijalnog rada i socijalne zaštite;
 - l) vodi propisanu evidenciju i prikuplja dokumentaciju o korisnicima socijalne zaštite, oblicima i uslugama socijalne zaštite, korisnicima civilnih žrtava rata i zaštite porodice sa djecom i vodi stručno-analitičke poslove i dostavlja podatke Ministarstvu,
 - m) obavlja poslove i ima ovlaštenja organa starateljstva, utvrđena Porodičnim zakonom i drugim zakonima i propisima;
 - n) razvija i unaprjeđuje saradnju sa lokalnom zajednicom;
 - o) obavlja i druge poslove utvrđene zakonom, aktima osnivača, Kantona i samog Centra.

Član 81.

- (1) Centar se osniva za područje općine, a može se osnovati za područje dvije ili više općina.
- (2) Centar za područje općine osniva općina, a Centar za dvije ili više općina osnivaju zajedno općine koje osnivaju centar.
- (3) Centar osnovan za područje dvije ili više općina, može organizovati rad po organizacionim jedinicama u svakoj općini za koju je isti osnovan.

Član 82.

Centar može da obavlja i djelatnost disciplinskog centra za vaspitno zapuštenu djecu, prihvatne stanice za djecu, dijagnostičko-opservacionog centra za vaspitno zanemarenu i zapuštenu djecu, prihvatilišta za odrasla lica, Centra za pružanje njege i pomoći u kući i druge djelatnosti, ukoliko na području za koje je Centar osnovan, ne postoji Ustanova za obavljanje tih djelatnosti.

Odjeljak B. Ustanove za djecu bez roditeljskog staranja, odgojno zanemarenu i djecu čiji je razvoj ometen porodičnim prilikama**Član 83.**

- (1) Ustanova za djecu bez roditeljskog staranja, odgojno zanemarenu i djecu čiji je razvoj ometen porodičnim prilikama (u daljem tekstu: Ustanova za djecu) pruža usluge socijalnog zbrinjavanja, odgoja, obrazovanja, zdravstvene zaštite djece bez roditeljskog staranja, djece čiji je razvoj ometen porodičnim prilikama i odgojno zanemarene djece (u daljem tekstu: šticenici).
- (2) Ustanova za djecu prima na smještaj i zaštitu šticenike iz stava (1) ovog člana do 18 godina, izuzetno iznad 18, a najduže do navršanja 27 godina života, ukoliko je potrebno šticeniku obezbijediti završetak školovanja, srednjeg i fakultetskog obrazovanja, a na prijedlog općinskog prvostepenog organa.
- (3) Ustanova za djecu je dužna pružiti organizovanu i individualnu stručnu pomoć za uspješno savlađivanje programa odgoja i obrazovanja šticenika.

Član 84.

- (1) U okviru svoga rada Ustanova za djecu može, uz prethodnu saglasnost Ministarstva, organizovati prihvatilište za samohrane nezaposlene trudnice i samohrane nezaposlene majke, ukoliko nema sredstava za izdržavanje ili kojoj je, usljed neriješenog stambenog pitanja ili poremećenih porodičnih odnosa potreban privremeni smještaj, sa djetetom do 12 mjeseci starosti.
- (2) Ustanova za djecu, uz prethodnu saglasnost Ministar-

stva, može organizovati i dnevni boravak djece sa i bez posebnih potreba, u skladu sa osnivačkim aktima Ustanove za djecu.

- (3) Prihvat samohranih nezaposlenih trudnica i samohranih nezaposlenih majki sa djetetom do 12 mjeseci starosti, odnosno dnevni boravak djece sa i bez posebnih potreba, vrši se na prijedlog općinskog prvostepenog organa, a uz prethodnu saglasnost Ministarstva.

Član 85.

Ustanova za djecu može, uz prethodnu saglasnost osnivača i Ministarstva, da dopuni svoju djelatnost proširenjem pružanja svojih usluga socijalnog karaktera.

Odjeljak C. Ustanova za djecu sa posebnim potrebama**Član 86.**

Ustanova za djecu sa posebnim potrebama pruža usluge od ukupnog značaja za dnevni boravak i zbrinjavanje djece sa posebnim potrebama, u smislu podsticaja socijalizacije, samozastupanja, zadovoljavanja osnovnih životnih potreba za druženjem, usmjeravanja pomoći djece jednih prema drugima, te posvećuje pažnju u radu sa roditeljima.

Član 87.

Ustanova za djecu iz člana 86. ovog zakona može se organizovati kao samostalna ustanova ili organizaciona jedinica u okviru ustanova socijalne zaštite i obrazovnih javnih ustanova.

Odjeljak D. Ustanova za odrasla i stara lica**Član 88.**

Ustanova za zaštitu odraslih i starih lica (u daljem tekstu: Ustanova za stara lica) pruža usluge socijalnog zbrinjavanja, odnosno organizovanog smještaja, prehrane, socijalnog rada, zdravstvene zaštite, pomoći i njege, odmora i rekreacije odraslih i starih lica, a kojima je potrebna stalna briga i pomoć u zadovoljavanju njihovih životnih potreba, a ne mogu ih ostvariti u vlastitoj ili drugoj porodici, odnosno na drugi način.

Član 89.

U okviru svoga rada Ustanova za stara lica može uz prethodnu saglasnost Ministarstva organizovati i dnevni boravak starih i odraslih lica, službu kućne njege i pomoći u kući, savjetovanište za stara lica i prihvatilište za odrasla i stara lica u skladu sa osnivačkim aktima Ustanove za stara lica.

Član 90.

Organizacija rada Ustanova utvrđuje se Pravilnikom o unutrašnjoj organizaciji i sistematizaciji.

**POGLAVLJE IV. UDRUŽENJA LICA SA
INVALIDITETOM****Član 91.**

- (1) U cilju ostvarivanja boljeg položaja i zaštite lica sa invaliditetom i zadovoljavanja njihovih potreba, ovisno od vrste i stepena invalidnosti, mogu se osnovati udruženja lica sa invaliditetom (u daljem tekstu: Udruženje).
- (2) Udruženja osnivaju, saglasno Zakonu o udruženjima i fondacijama („Službene novine Federacije BiH“, broj: 45/02), lica sa invaliditetom.

Član 92.

Osnovne programske aktivnosti i ciljevi Udruženja iz člana 91. ovog zakona su:

- a) okupljanje i pružanje pomoći licima sa invaliditetom i licima sa posebnim potrebama;
- b) pružanje pomoći članovima udruženja: u rehabilitaciji i resocijalizaciji, u potencijalnom zapošljavanju, odnosno podsticaju zapošljavanja, dodatnim vidovima obrazovanja, odnosno dokvalifikacije i prekvalifikacije, zadovoljavanju kulturnih potreba, informisanju, obezbjeđivanju tehničkih pomagala, rješavanju statusnih pitanja;
- c) okupljanje, pružanje pomoći i provođenje programskih aktivnosti socijalnog karaktera od značaja za oblasti iz domena ovog zakona.

Član 93.

Sredstva za finansiranje rada udruženja obezbjeđuju se iz:

- a) članarina,
- b) donacija,
- c) legata,
- d) drugih izvora u skladu sa propisima.

Član 94.

Zavisno od programskih ciljeva i zadataka Udruženja, Kanton i općine, shodno svojim mogućnostima, mogu participirati u obezbjeđivanju dijela potrebnih sredstava od značaja za podsticaj rada udruženja.

Član 95.

Ministarstvo i općinski prvostepeni organi, pri utvrđivanju politike za ostvarivanje svojih programa rada, odnosno programa socijalne zaštite, saraduju sa legitimnim predstavnicima Udruženja ili njihovim starateljima, kao i sa drugim udruženjima, odnosno organizacijama koje se bave aktivnostima socijalnog karaktera.

DIO TREĆI - ZAŠTITA CIVILNIH ŽRTAVA RATA**Član 96.**

- (1) Civilna žrtva rata, u smislu ovog i Federalnog zakona, je lice kod kojeg je tokom rata ili neposredne ratne opasnosti, usljed ranjavanja ili nekog drugog oblika ratne torture nastupilo oštećenje organizma, što uključuje mentalno oštećenje ili značajno narušavanje zdravlja ili nestanak ili pogibiju tog lica, pod okolnostima utvrđenim Federalnim zakonom (u daljem tekstu: civilna žrtva rata).
- (2) Posebnom kategorijom civilnih žrtava rata smatraju se lica koja su preživjela seksualno zlostavljanje i silovanje.
- (3) Status civilne žrtve rata, u smislu stava (1) i stava (2) ovog člana, priznaje se i civilnim licima i pripadnicima snaga bivše tzv. „Autonomne pokrajine Zapadna Bosna“, ukoliko ne ostvaruju odgovarajuća prava po Zakonu o pravima branilaca i članova njihovih porodica („Službene novine FBiH“ broj: 33/04 i 56/05).
- (4) U skladu sa ovim Zakonom, u cilju ostvarivanja određenih prava, priznaje se status civilne žrtve rata licu kod kojeg je nastupilo oštećenje organizma ispod 60 % ili značajno narušavanje zdravlja.

Član 97.

Radi ostvarivanja prava utvrđenih ovim i Federalnim zakonom, civilne žrtve rata se razvrstavaju prema utvrđenom procentu oštećenja organizma u šest grupa, utvrđenih Federalnim zakonom.

Član 98.

Civilne žrtve rata, po ovom i Federalnom zakonu, imaju sljedeća prava:

- a) ličnu invalidninu ili mjesečno lično novčano primanje;
- b) dodatak za njegu i pomoć od strane drugog lica;
- c) ortopedski dodatak;
- d) porodičnu invalidninu;
- e) zdravstvenu zaštitu;
- f) pomoć u troškovima liječenja i nabavci ortopedskih pomagala;

- g) osposobljavanje za rad (profesionalna rehabilitacija, prekvalifikacija i dokvalifikacija);
- h) prioritetno zapošljavanje;
- i) prioritetno stambeno zbrinjavanje;
- j) psihološku i pravnu pomoć.

Član 99.

- (1) Lična invalidnina utvrđuje se u mjesečnom iznosu prema grupi oštećenja organizma iz Federalnog zakona u visini 70 %, od mjesečnog iznosa lične invalidnine ratnih vojnih invalida, i to 50 % iz federalnog budžeta, a 20 % iz budžeta Kantona (u daljem tekstu: kantonalni budžet), odgovarajuće grupe po propisima iz Zakona o pravima branilaca i članova njihovih porodica, izuzev za lica iz člana 96. stav (2) ovog zakona, kako slijedi:

Odgovarajuća grupa civilnih žrtava rata	% oštećenja organizma civilne žrtve rata	Mjesečna visina invalidnine u % od osnovice
I	100 Potrebna pomoć i njega od strane drugog lica	100
II	100	73
III	90	55
IV	80	43
V	70	32
VI	60	18

- (2) Mjesečno lično novčano primanje, za lica iz člana 96. stav (2) ovog zakona, iznosi 70 % od osnovice iz stava (1) ovog člana.

Član 100.

- (1) Pravo na dodatak za njegu i pomoć od strane drugog lica imaju civilne žrtve rata od I. do IV. grupe, koje su nesposobne za zadovoljavanje osnovnih životnih potreba bez pomoći drugog lica.
- (2) Dodatak za njegu i pomoć od strane drugog lica, određuje se u mjesečnom iznosu u visini 70 % od mjesečnog iznosa dodatka za njegu i pomoć od strane drugog lica za ratne vojne invalide, odgovarajućeg stepena invalidnosti i to 50 % iz federalnog budžeta, a 20 % iz kantonalnog budžeta.

Član 101.

Korisnik dodatka za njegu i pomoć od strane drugog lica, koji ispunjava uvjete za ostvarivanje tog prava i po drugim propisima može, po sopstvenom izboru, koristiti to pravo samo po jednom osnovu.

Član 102.

- (1) Pravo na ortopedski dodatak imaju civilne žrtve rata kojima je tjelesno oštećenje utvrđeno zbog oštećenja organizma koja su neposredna posljedica zadobivene rane, povrede ili ozljede koja je prouzrokovala amputaciju ekstremiteta ili teško oštećenje funkcije ekstremiteta ili potpuni gubitak vida na oba oka.
- (2) Ortopedski dodatak određuje se u mjesečnom iznosu u visini od 70 % od mjesečnog iznosa ortopedskog dodatka za ratne vojne invalide odgovarajućeg stepena invalidnosti, i to 50 % iz federalnog budžeta, a 20 % iz kantonalnog budžeta.

Član 103.

- (1) Članovi porodice civilnih žrtava rata iz člana 54. stav (2) tačke 5) i 6) Federalnog zakona imaju, uz uvjete propisane Federalnim i ovim zakonom, pravo na porodičnu invalidninu.
- (2) Pravo na porodičnu invalidninu, uz uvjete propisane Federalnim zakonom, imaju i članovi porodice civilne žrtve rata od prve do četvrte grupe koji su do smrti koristili dodatak za njegu i pomoć od strane drugog lica, pod uvjetom da je smrt civilne žrtve rata posljedica rane, povrede, ozljede ili bolesti, po osnovu koje joj je utvrđeno pravo po ovom zakonu.
- (3) Osnovica za određivanje porodične invalidnine iznosi 70 % od osnovice za određivanje porodične invalidnine za porodice šehida, odnosno poginulog borca i to 50 % iz federalnog budžeta, a 20 % iz kantonalnog budžeta.
- (4) Iznos porodične invalidnine utvrđuje se u mjesečnom iznosu od osnovice iz stava (3) ovog člana i to:
- a) za jednog člana porodice u visini 43 % od osnovice,
 - b) za dva člana porodice u visini od 55 % od osnovice,
 - c) za tri člana porodice u visini od 60 % od osnovice,
 - d) za četiri i više članova porodice u visini 65 % od osnovice.

Član 104.

- (1) Lična invalidnina, dodatak za njegu i pomoć od strane drugog lica, ortopedski dodatak i porodična invalidnina, po ovom zakonu, pripadaju korisnicima istih prava (u daljem tekstu: korisnici) od prvog dana narednog mjeseca od dana podnošenja zahtjeva za priznavanje tih prava.
- (2) Pravo na porodičnu invalidninu pripada članovima porodice nestale civilne žrtve rata do njenog proglašenja umrlom, a najduže dvije godine od dana stupanja na snagu Federalnog zakona, kada im prava prestaju, ukoliko u tom roku ne pokrenu postupak za proglašenje civilne žrtve rata umrlom.

Član 105.

- (1) Bračni drug stupanjem u drugi brak ili u vanbračnu zajednicu, gubi prava utvrđena po ovom zakonu za civilne žrtve rata koja je ostvario kao član porodice.
- (2) Bračni ili vanbračni drug gubi prava po ovom zakonu i kada je napustio djecu, s kojom koristi pravo, zanemario njihovo izdržavanje, podizanje i odgoj. Ta prava se mogu ponovo uspostaviti ako bračni ili vanbračni drug nastavi obavljati roditeljsku dužnost za vrijeme dok se djeca koriste pravima u skladu sa ovim zakonom.
- (3) Korisniku prava po ovom zakonu prestaje to pravo napuštanjem Bosne i Hercegovine, duže od 3 mjeseca, računajući od dana napuštanja Bosne i Hercegovine.
- (4) Povratkom u Bosnu i Hercegovinu, korisnik prava po ovom zakonu, može podnijeti zahtjev za ponovno uspostavljanje tih prava.

Član 106.

Civilna žrtva rata i članovi porodice civilne žrtve rata koji su ostvarili pravo na porodičnu invalidninu, imaju pravo na zdravstvenu zaštitu pod uvjetom da status osiguranog lica nisu mogli ostvariti ni po kom drugom osnovu u skladu sa propisima o zdravstvenom osiguranju.

Član 107.

- (1) Pravo na pomoć u obezbjeđenju troškova liječenja ostvaruje civilna žrtva rata u izuzetnim okolnostima.
- (2) Izuzetnim okolnostima smatraju se okolnosti u kojima je život civilne žrtve rata doveden u pitanje.
- (3) Potrebu za obezbjeđenjem troškova liječenja utvrđuje organ iz člana 23. stav (1) ovog zakona.
- (4) Pomoć iz stava (1) ovog člana, utvrđuje se u visini do 50 % od osnovice iz člana 9. ovog zakona.

Član 108.

Pravo na pomoć u nabavci ortopedskih pomagala ostvaruje civilna žrtva rata, pod uvjetima i na način utvrđen propisima iz oblasti zdravstvene zaštite.

Član 109.

Pravo na osposobljavanje za rad (profesionalna rehabilitacija, prekvalifikacija i dokvalifikacija), ima civilna žrtva rata pod uvjetima i na način predviđen propisima o posredovanju u zapošljavanju i socijalnoj sigurnosti nezaposlenih lica.

Član 110.

Pravo na prioritetno zapošljavanje ostvaruju civilne žrtve rata, pod uvjetima i na način predviđen propisima o

posredovanju u zapošljavanju i socijalnoj sigurnosti nezaposlenih lica.

DIO ČETVRTI – ZAŠTITA PORODICE SA DJECOM**POGLAVLJE I. OSNOVNA PRAVA PORODICE SA DJECOM****Član 111.**

Zaštita porodice sa djecom, u smislu ovog zakona, je osiguranje porodice kroz materijalna i druga davanja, radi pomaganja u podizanju, odgoju i zbrinjavanju djece, kao i njihovom osposobljavanju za samostalan život i rad, u najboljem interesu djeteta.

Član 112.

(1) Osnovna prava porodice sa djecom su:

- a) dodatak na djecu;
- b) naknada umjesto plaće ženi-majci u radnom odnosu, za vrijeme dok odsustvuje sa posla radi trudnoće, porođaja i njege djeteta;
- c) novčana pomoć za vrijeme trudnoće i porođaja žene-majke koja nije u radnom odnosu;
- d) jednokratna pomoć za opremu novorođenog djeteta;
- e) pomoć u prehrani djeteta do šest mjeseci i dodatna ishrana za majke – dojilje;
- f) posebni psihosocijalni tretman bračnih drugova koji žele djecu i trudnica;
- g) smještaj djece uz osiguranu ishranu u ustanovama predškolskog odgoja;
- h) osiguranje jednog obroka u vrijeme nastave u škola-ma osnovnog obrazovanja;
- i) školarine i stipendije đacima i studentima.

(2) Propisom općine mogu se utvrditi i druga prava porodice sa djecom.

Odjeljak A. Dodatak na djecu**Član 113.**

- (1) Pravo na dječiji dodatak pripada porodici sa djecom koja se neposredno brine o djetetu, a čiji mjesečni prihodi ostvareni po svim osnovama izuzev primanja ostvarenih iz socijalne zaštite i zaštite porodice sa djecom, po članu domaćinstva ne prelaze iznos od 15% od prosječne plaće Kantona.
- (2) Djetetu bez oba ili jednog roditelja, porodici koja ima dijete ometeno u fizičkom ili psihičkom razvoju i porodici u kojoj oba ili jedan roditelj imaju najmanje 60%

oštećenje organizma, pripada pravo na dječiji dodatak bez obzira na imovinske uvjete.

Član 114.

Ukupan prihod domaćinstva čine prihodi koje članovi domaćinstva ostvaruju u smislu člana 24. ovog zakona.

Član 115.

- (1) Iznos dječijeg dodatka utvrđuje se u mjesečnom iznosu od 2% od prosječne plaće Kantona, po djetetu.
- (2) Iznos dječijeg dodatka iz člana 113. stav (2) ovog zakona, utvrđuje se u mjesečnom iznosu od 3%, od prosječne plaće Kantona, po djetetu.

Član 116.

- (1) Pravo na dječiji dodatak obavezno pripada djetetu do navršene 15. godine života, ukoliko ispunjava uvjete predviđene ovim zakonom.
- (2) Dijete starije od 15 godina života ostvaruje pravo na dječiji dodatak, pod uvjetom:
 - a) da se nalazi na redovnom obrazovanju u osnovnim, srednjim i višim školama, akademijama ili fakultetima, a najduže do navršene 27. godine života;
 - b) ako je nesposobno za samostalan život i rad, a nesposobnost je nastupila do 15. godine života ili u toku redovnog obrazovanja, a najduže do navršene 27. godine života.

Član 117.

Dječiji dodatak isplaćuje se i za vrijeme dok je dijete usljed bolesti ili liječenja, spriječeno da izvršava svoje obaveze u školi, odnosno fakultetu, ali najduže do navršene 27. godine života.

Član 118.

Dječiji dodatak ne pripada djetetu koje je smješteno u ustanovu dječije i socijalne zaštite.

Član 119.

- (1) Dječiji dodatak prestaje djetetu koje stupi u brak.
- (2) Ukoliko se utvrdi da se dječiji dodatak nenamjenski koristi, nadležni organ starateljstva može odrediti da se dječiji dodatak isplaćuje drugom roditelju ili licu kod kojeg se dijete nalazi na izdržavanju.

Odjeljak B. Naknada umjesto plaće ženi-majci u radnom odnosu za vrijeme dok odsustvuje sa posla, radi trudnoće, porođaja i njege djeteta

Član 120.

- (1) Naknada umjesto plaće ženi-majci u radnom odnosu za vrijeme dok odsustvuje sa posla radi trudnoće, porođaja i njege djeteta (u daljem tekstu: naknada plaće) isplaćuje se za vrijeme korištenja porodiljskog odsustva.
- (2) Osnovicu za naknadu plaće predstavlja prosječna plaća koju je žena-zaposlenik ostvarila u periodu od 6 mjeseci, prije početka korištenja odsustva zbog porođaja.
- (3) Naknadu plaće iz ovog člana ostvaruje žena-zaposlenik sa područja Kantona neovisno od sjedišta poslodavca.
- (4) Uputstvo o načinu obračuna, doznaci sredstava i isplati naknade plaće, donosi Ministar.

Član 121.

- (1) Naknada plaće utvrđuje se u visini iznosa od 80% od osnovice za naknadu plaće iz člana 120. stav (2) ovog zakona.
- (2) Naknada plaće, iz stava (1) ovog člana, ne može biti veća od prosječne, posljednje, objavljene neto plaće Kantona.
- (3) Ukoliko žena-majka u periodu od šest mjeseci prije porođaja nije primila ili nije redovno primala plaću, naknada plaće, iz stava (1) ovog člana, ne može biti manja od 200 KM.

Član 122.

Naknadu plaće iz člana 120. ovog zakona može ostvariti otac djeteta, odnosno usvojitelj u slučaju smrti majke, ako majka napusti dijete ili ako je iz opravdanih razloga spriječena da koristi isto pravo.

Član 123.

- (1) Ženi-majci, koja u skladu sa propisima o radu, ima pravo na rad sa polovinom punog radnog vremena, naknadu plaće za polovinu do punog radnog vremena, kada ne radi, isplaćuje Kanton u visini od 10% njene plaće koju bi ostvarila za rad sa punim radnim vremenom.
- (2) Pravo iz stava (1) ovog člana može ostvariti i otac djeteta u slučajevima navedenim u članu 122. ovog zakona.

Član 124.

U slučaju kada žena-majka koja rodi mrtvo dijete ili ako dijete umre prije isteka porođajnog odsustva, na osnovu nalaza ovlaštenog liječnika, ima pravo da produži porođajno odsustvo za onoliko vremena, koliko je potrebno da se opo-

ravi od porođaja i psihičkog stanja uzrokovanog gubitkom djeteta, za to vrijeme joj pripada pravo na naknadu plaće u skladu sa članom 120. i 121. ovog zakona.

Član 125.

- (1) Jedan od roditelja djeteta sa težim smetnjama u razvoju (teže hendikepiranog djeteta) u slučaju da se radi o samohranom roditelju ili da su oba roditelja zaposlena, a dijete nije smješteno u ustanovu socijalno - zdravstvenog zbrinjavanja, ima pravo na naknadu plaće za polovinu punog radnog vremena, kada ne radi, u iznosu od 20% od plaće koju bi ostvario za rad sa punim radnim vremenom.
- (2) Dužinu potrebe za skraćenim radom, utvrđuje svojim nalazom nadležna zdravstvena ustanova.

Član 126.

Na naknadu plaće iz ovog zakona vrši se obračun i uplata doprinosa i poreza u skladu sa zakonom.

Odjeljak C. Novčana pomoć za vrijeme trudnoće i porođaja žene-majke koja nije u radnom odnosu

Član 127.

- (1) Novčana pomoć za vrijeme trudnoće i porođaja žene-majke koja nije u radnom odnosu ostvaruje se u vidu jednokratne novčane pomoći i iznosi 150 KM, po svakom novorođenčetu.
- (2) Jednokratnu novčanu pomoć iz stava (1) ovog člana, ostvaruje porodilja koja nije u radnom odnosu, pod uvjetom da ima prijavljeno prebivalište, odnosno boravište na području Kantona, i da mjesečni prihodi domaćinstva, ostvareni u periodu od šest mjeseci koja prethode mjesecu u kome je podnesen zahtjev za ostvarivanje prava na novčanu pomoć, ne prelazi iznos od 50 % od prosječne plaće Kantona.

Odjeljak D. Jednokratna pomoć za opremu novorođenog djeteta

Član 128.

- (1) Jednokratna pomoć za opremu novorođenog djeteta ostvaruje se u iznosu od 15% od posljednje objavljene prosječne plaće Kantona.
- (2) Pravo iz stava (1) ovog člana mogu ostvariti porodilje iz člana 127. ovog zakona.

Odjeljak E. Pomoć u prehrani djeteta do 6 mjeseci i dodatna ishrana za majke – dojilje

Član 129.

- (1) Pravo na pomoć u prehrani djeteta do 6 mjeseci i dodatnu ishranu za majke dojilje ostvaruje se, u trajanju od 6 mjeseci, ukoliko su ispunjeni uvjeti za ostvarivanje prava na novčanu pomoć iz člana 127. ovog zakona.
- (2) Iznos pomoći se određuje u visini od 10% od prosječne plaće Kantona.

Odjeljak F. Posebni psihosocijalni tretman bračnih partnera koji žele djecu i trudnica

Član 130.

Pravo na posebni psihosocijalni tretman bračnih partnera koji žele djecu i trudnica ostvaruje se u porodičnom savjetovalištu obrazovanom pri organu starateljstva.

Odjeljak G. Smještaj djece uz osiguranu ishranu u ustanovama predškolskog odgoja

Član 131.

- (1) Smještaj djece, uz osiguranu ishranu u ustanovama predškolskog odgoja, obezbjeđuje se djeci predškolskog uzrasta na području Kantona.
- (2) Pravo na subvenciju dijela troškova boravka pojedinih socijalnih kategorija djece u predškolskoj ustanovi, ostvaruje se u skladu sa odlukom općine o kriterijima subvencioniranja troškova smještaja djece u predškolskim ustanovama.

Odjeljak H. Osiguranje jednog obroka u vrijeme nastave u školama osnovnog obrazovanja

Član 132.

- (1) Pravo na osiguranje jednog obroka u vrijeme nastave mogu ostvariti djeca porodica korisnika stalne novčane pomoći, koja pohađaju osnovnu školu.
- (2) Pravo iz stava (1) ovog člana može se ostvariti u vrijeme nastave u osnovnim školama, o čemu odlučuje općina.

Odjeljak I. Pravo na školarine i stipendije dacima i studentima

Član 133.

- (1) Pravo na školarine i stipendije, odnosno prednost u smislu bodovanja i rangiranja kandidata, imaju đaci i stu-

denti sa područja Kantona, koji zadovoljavaju kriterije za ostvarivanje ovog prava.

- (2) Kriterije za ostvarivanje prava na školarine i stipendije iz budžetskih sredstava Kantona, utvrđuje Vlada Kantona.

POGLAVLJE II. DJEČIJA NEDJELJA

Član 134.

- (1) Na teritoriji Federacije Bosne i Hercegovine svake godine prva sedmica mjeseca oktobra, određuje se kao "Dječija nedjelja" koja se uvodi radi podsticanja i organizovanja raznovrsnih kulturno-obrazovnih, rekreativnih i drugih manifestacija posvećenih djeci i preduzimanja drugih mjera i akcija za unaprjeđenje razvoja brige o djeci.
- (2) Tokom cijelog mjeseca oktobra za "Dječiju nedjelju" će se naplaćivati novčani iznosi, na način određen ovim i Federalnim zakonom.

Član 135.

Aktivnosti obilježavanja „Dječije nedjelje“ u Kantonu, planiraju se za svaku godinu posebnim programom, koji tim povodom donosi Ministar.

Član 136.

- (1) Naplaćene novčane iznose utvrđene Odlukom Vlade Federacije Bosne i Hercegovine, privredna društva, poslodavci i druga pravna i fizička lica, koja vrše naplatu na području Kantona, dužna su uplatiti na račun budžeta Kantona u roku od 15 dana, po isteku mjeseca oktobra.
- (2) Način naplate novčanih iznosa iz člana 134. stav (2) ovog zakona bliže će propisati ministar Ministarstva finansija Kantona.

Član 137.

- (1) Uplaćena i utvrđena sredstva u budžetu Kantona sa pozicije "Dječija nedjelja", Ministarstvo raspoređuje organizatorima raznovrsnih kulturno-obrazovnih, rekreativnih i drugih manifestacija posvećenih djeci i u svrhu preduzimanja drugih mjera i akcija za unaprjeđenje razvoja brige o djeci.
- (2) Na osnovu prijedloga općinskog prvostepenog organa dio sredstava iz stava (1) ovog člana može se odobriti kao pomoć u rješavanju pojedinačnih slučajeva-djece, odnosno za socijalne namjene, a shodno Programu obilježavanja „Dječije nedjelje“ na području Kantona.

DIO PETI – POSTUPAK ZA OSTVARIVANJE PRAVA IZ SOCIJALNE ZAŠTITE, ZAŠTITE CIVILNIH ŽRTAVA RATA I ZAŠTITE PORODICE SA DJECOM

Član 138.

- (1) O pravima utvrđenim ovim i Federalnim zakonom, u prvom stepenu rješava općinski prvostepeni organ.
- (2) O žalbi protiv rješenja općinskog prvostepenog organa, rješava Ministarstvo.

Član 139.

- (1) Postupak za ostvarivanje prava, po ovom zakonu, pokreće se na zahtjev lica kojem je, u smislu ovog zakona, potrebna zaštita ili na zahtjev njegovog zakonskog zastupnika, odnosno člana domaćinstva imenovanog za staratelja.
- (2) Općinski prvostepeni organ može odrediti odraslo lice koje predstavlja porodicu radi prava utvrđenih ovim zakonom.
- (3) Postupak za ostvarivanje prava iz socijalne zaštite pokrenut će po službenoj dužnosti nadležni općinski prvostepeni organ nakon određenih saznanja ili obavijesti pruženih od strane fizičkih ili pravnih lica, a koja ukazuju na potrebu pokretanja postupka.
- (4) Za ostvarivanje prava iz člana 112. stav (1) tačka b), c), d) i e) ovog zakona stranka podnosi zahtjev u roku od 60 dana od dana porođaja.
- (5) Ukoliko stranka podnese zahtjev po isteku ovog roka, pravo joj teče od prvog dana u mjesecu u kojem je zahtjev podnesen.
- (6) Izuzetno, ukoliko je stranka samohrana majka ili majka koja se porodila putem carskog reza bila spriječena da podnese zahtjev u propisanom roku iz stava (4) ovog člana, može joj se priznati pravo od dana poroda samo ukoliko zahtjev podnese najkasnije do mjesec dana od dana isteka roka za podnošenje zahtjeva utvrđenog u stavu (4) ovog člana.
- (7) Ministar će donijeti propis o načinu vođenja evidencije u oblastima socijalne zaštite i zaštite porodice sa djecom.

Član 140.

Prije donošenja rješenja o ostvarivanju prava na smještaj u drugu porodicu iz člana 45. ovog zakona, općinski prvostepeni organ dužan je zatražiti saglasnost Ministarstva, kojem je za svaki konkretan slučaj dužan dostaviti socijalnu anamnezu.

Član 141.

- (1) Prava po ovom zakonu pripadaju korisniku od prvog dana narednog mjeseca po podnošenju zahtjeva, odnosno pokretanja postupka po službenoj dužnosti, ako ovim zakonom nije drugačije određeno i traju dok postoje uvjeti za sticanje i korištenje prava po ovom i Federalnom zakonu.
- (2) Raseljena lica koja borave u Kantonu, prava ostvarena po ovom zakonu, nastavljaju ostvarivati i povratkom u ranija prebivališta i to najduže 12 mjeseci od povratka.

Član 142.

- (1) U slučajevima kada će se smještaj u Ustanovu, iz člana 55. ovog zakona, djelimično ili u potpunosti financirati iz budžeta Kantona, općinski prvostepeni organ dužan je prije donošenja rješenja o upućivanju lica u Ustanovu, zatražiti saglasnost Ministarstva, kojem je za svaki konkretan slučaj dužan dostaviti socijalnu anamnezu. Nakon pribavljanja saglasnosti, općinski prvostepeni organ može donijeti rješenje o upućivanju lica u Ustanovu.
- (2) Izuzetno, smještaj lica iz stava (1) člana 55., izvršit će se bez pribavljanja saglasnosti iz stava (1) ovog člana uz obavezu pribavljanja saglasnosti u roku od 15 dana od dana izvršenja smještaja po hitnom postupku.

Član 143.

Korisnik prava po ovom zakonu, dužan je organu koji vodi postupak, prijaviti svaku promjenu koja je od uticaja na ostvarivanje i obim tog prava, u roku od 15 dana od dana nastale promjene.

Član 144.

- (1) Licu koje se nađe u stanju socijalne potrebe, a sa područja je drugog kantona, pružit će se potreban oblik socijalne zaštite od strane općinskog prvostepenog organa.
- (2) Od strane organa iz stava (1) ovog člana, odgovarajući oblik socijalne zaštite pružit će se i licu u stanju socijalne potrebe sa područja druge općine Kantona.
- (3) Za pruženu zaštitu i izvršene usluge, obračunat će se troškovi i fakturisati nadležnim prvostepenim organima općine prebivališta, lica iz stava (1) ovog člana.

Član 145.

Lice kome se ne može utvrditi prebivalište ostvaruje potreban oblik socijalne zaštite od strane općinskog prvostepenog organa, prema mjestu boravišta.

Član 146.

- (1) Prvostepena rješenja kojima se utvrđuju prava po ovom zakonu, povremeno podliježu reviziji.
- (2) Reviziju po službenoj dužnosti vrši Ministarstvo, prema Instrukciji koju donosi Ministar.
- (3) Ako je protiv prvostepenog rješenja izjavljena žalba, o reviziji i žalbi rješava se istim rješenjem.

Član 147.

- (1) U postupku revizije Ministarstvo se može sa prvostepenim rješenjem saglasiti, izmijeniti ga, poništiti ili ga ukinuti.
- (2) Ministarstvo će u postupku revizije poništiti ili ukinuti prvostepeno rješenje i predmet vratiti na ponovni postupak – odnosno samostalno riješiti ako utvrdi da:
 - a) su u prvostepenom postupku nepotpuno ili pogrešno utvrđene činjenice;
 - b) se u postupku nije vodilo računa o pravilima postupka koja bi bila od uticaja na rješenje stvari;
 - c) su pogrešno ocijenjeni dokazi;
 - d) je iz utvrđenih činjenica izveden pogrešan zaključak o činjeničnom stanju;
 - e) je pogrešno primjenjen propis na osnovu koga je riješeno.
- (3) Ukoliko je rješenje u postupku revizije poništeno ili ukinuto i predmet vraćen na ponovni postupak, prvostepeni organ donosi novo rješenje.
- (4) Protiv novog rješenja iz stava (3) ovog člana može se izjaviti žalba i vodi se revizioni postupak, saglasno odredbama ovog zakona.

Član 148.

Kada u postupku revizije bude izmijenjeno prvostepeno rješenje to rješenje ima pravnu snagu od prvog dana narednog mjeseca od dana donošenja.

Član 149.

- (1) U slučajevima kada iznosi visine novčane pomoći, odnosno naknade nisu fiksno utvrđeni, usklađivanje primanja po osnovu prava korisnika socijalne zaštite iz člana 19. ovog zakona, a u vezi sa promjenama iznosa prosječne plaće Kantona, općinski prvostepeni organ vrši jednom godišnje.
- (2) Usklađivanje primanja po osnovu prava na dječiji dodatak iz člana 112. tačka a) ovog Zakona, a u vezi sa promjenama iznosa prosječne plaće Kantona, općinski prvostepeni organ vrši jednom godišnje.

**DIO ŠESTI – FINANSIRANJE SOCIJALNE ZAŠTITE,
ZAŠTITE CIVILNIH ŽRTAVA RATA I
ZAŠTITE PORODICE SA DJECOM**

Član 150.

- (1) Sredstva finansiranja socijalne zaštite, zaštite civilnih žrtava rata i zaštite porodice sa djecom osiguravaju se u skladu sa ovim i Federalnim zakonom iz:
- budžeta Kantona;
 - budžeta općine;
 - ulaganja osnivača;
 - privrednih i uslužnih djelatnosti ustanova;
 - ličnog učešća korisnika;
 - legata, poklona i zavještanja;
 - drugih izvora.
- (2) Zavisno od mogućnosti Kantona i općina Kantona, priliva sredstava u budžet Kantona i budžeta općina Kantona i ukupnih potreba za finansiranjem socijalne zaštite, zaštite civilnih žrtava rata i zaštite porodice sa djecom propisom Kantona mogu se propisati i novi izvori finansiranja oblasti iz stava (1) ovog člana.

Član 151.

- (1) Iz kantonalnog budžeta finansiraju se oblici socijalne zaštite, zaštite civilnih žrtava rata i zaštite porodice sa djecom i to:
- stalna novčana pomoć u obimu od 60 % potrebnih sredstava;
 - novčana naknada za pomoć i njegu od strane drugog lica;
 - osposobljavanje za život i rad;
 - smještaj u drugu porodicu;
 - smještaj u ustanove socijalne zaštite;
 - prava civilnih žrtava rata u obimu utvrđenom Federalnim zakonom;
 - Dodatak na djecu;
 - naknada umjesto plaće ženi-majci u radnom odnosu za vrijeme dok odsustvuje sa posla radi trudnoće, porođaja i njege djeteta;
 - novčana pomoć za vrijeme trudnoće i porođaja žene-majke koja nije u radnom odnosu;
 - jednokratna pomoć za opremu novorođenog djeteta;
 - pomoć u prehrani djeteta do 6 mjeseci i dodatna ishrana za majke dojilje;
 - školarine i stipendije đacima i studentima;
 - zdravstvena zaštita korisnika socijalne zaštite.
- (2) U skladu sa svojim mogućnostima Kanton će finansirati ostale dodatne potrebe i intervencije socijalno-zaštitnog karaktera.
- (3) Iz budžeta Kantona finansiraju se ustanove i institucije koje osniva Kanton u funkciji obavljanja djelatnosti iz okvira ovog zakona.

- (4) U skladu sa svojim mogućnostima, Kanton će podsticati rad kantonalnih Udruženja, drugih srodnih udruženja i organizacija socijalnog karaktera.

Član 152.

- (1) Iz općinskog budžeta finansirat će se:
- stalna novčana pomoć u obimu od 40 % potrebnih sredstava,
 - druge materijalne pomoći iz člana 33. ovog zakona;
 - usluge socijalnog i drugog stručnog rada;
 - kućna njega i pomoć u kući;
 - posebni psihosocijalni tretman bračnih drugova koji žele djecu i trudnica;
 - smještaj djece uz osiguranu ishranu u ustanovama predškolskog odgoja;
 - osiguranje jednog obroka u vrijeme nastave u školama osnovnog obrazovanja;
 - i druga prava iz socijalne zaštite, koja svojim propisima utvrđuju, odnosno planiraju općine.
- (2) Iz budžeta općine finansiraju se Ustanove, čiji je osnivač općina.
- (3) U skladu sa svojim mogućnostima općina će podsticati rad općinskih Udruženja, drugih srodnih udruženja i organizacija socijalnog karaktera.

Član 153.

- (1) Troškove postupka za ostvarivanje prava iz oblasti socijalne zaštite, osim prava iz člana 20. tačka b) ovog zakona, snosi organ koji vodi postupak.
- (2) U slučaju utvrđivanja potrebe za pomoći i njegom od strane drugog lica u prvostepenom i drugostepenom postupku, u dijelu koji se odnosi na troškove pribavljanja nalaza, ocjene i mišljenja iz člana 30. stav (3) ovog zakona, snosi organ koji provodi postupak u iznosu od 70% i podnosilac zahtjeva u iznosu od 30% tih troškova.

**DIO SEDMI – NADZOR NAD PROVOĐENJEM
OVOG ZAKONA I NAD RADOM
USTANOVA**

Član 154.

Ministarstvo vrši nadzor nad provođenjem ovog zakona, drugih propisa i općih akata donesenih u skladu sa ovim zakonom, kao i nadzor nad stručnim radom Ustanova koje osniva Kanton, odnosno općina, izdaje instrukcije i vrši upravni nadzor i kontrolu namjenskog trošenja sredstava namijenjenih za ostvarivanje prava po ovom zakonu, a koja se obezbjeđuju iz kantonalnog budžeta (u daljem tekstu: nadzor).

Član 155.

Općinski prvostepeni organ koji je odlučio o smještaju lica u drugu porodicu obavlja nadzor nad tom porodicom, pruža pomoć toj porodici i redovnim obilaskom održava stalnu vezu sa smještenim licem.

Član 156.

Nadzor ima za cilj unaprjeđivanje stručnog rada, in-strukturiranje, pravovremeno uočavanje i registrovanje nepravilnosti i propusta u stručnom radu, a radi preduzimanja odgovarajućih mjera potrebnih za sprječavanje ili otklanjanje štetnih posljedica.

Član 157.

- (1) Nadzor vrši Ministarstvo na osnovu plana koji utvrđuje Ministar.
- (2) Planom iz stava (1) ovog člana obezbjeđuje se stalni nadzor.
- (3) Općinski prvostepeni organ, odnosno Ustanova je dužna omogućiti obavljanje nadzora u skladu sa ovim zakonom.

Član 158.

- (1) Nakon obavljenog nadzora podnosi se izvještaj Ministru u roku od 8 dana.
- (2) Izvještaj iz stava (1) ovog člana obavezno sadrži:
 - a) prikaz utvrđenog stanja;
 - b) prijedlog mjera i rokove za otklanjanje nedostataka i
 - c) prijedlog drugih mjera koje je potrebno preduzeti.

Član 159.

- (1) Ministarstvo je dužno da razmotri izvještaj i utvrdi mjere za otklanjanje nedostataka i rokove za njihovo izvršenje, te da o tome obavijesti Ustanovu, u kojoj je nadzor izvršen.
- (2) Ustanova je dužna otkloniti utvrđene nedostatke u skladu sa rokovima iz stava (1) ovog člana, a najkasnije 60 dana od dana prijema obavještenja.

DIO OSMI – NAKNADA ŠTETE**Član 160.**

Korisnik, koji je na osnovu rješenja o priznavanju prava iz ovog zakona, ostvario određena primanja na koja nije imao pravo, dužan je u roku koji mu odredi općinski prvostepeni organ vratiti primljeni iznos, ako je to pravo ostvario:

- a) na osnovu neistinitih ili netačnih podataka za koje je znao ili morao znati da su neistiniti, odnosno netačni

ili je na drugi protivpravan način ostvario primanja na koja nije imao pravo, ili je isto ostvario u većem obimu od onog koji mu pripada;

- b) zbog toga što nije prijavio promjenu, koja bi uticala na prestanak ili obim prava, a znao je ili je morao znati za tu promjenu.

Član 161.

- (1) Ako korisnik primanja ne postupi na način određen članom 160. ovog zakona, povrat spornog iznosa ostvarit će se tužbom, putem nadležnog suda.
- (2) Općinski prvostepeni organ će, ovisno od ukupnih socijalnih okolnosti konkretnog slučaja:
 - a) tražiti vraćanje primljenih iznosa u ratama,
 - b) osloboditi osobu kao korisnika obaveze vraćanja cijelog iznosa, u slučajevima kada bi ostvarivanjem takvog potraživanja nasljednici i članovi porodice korisnika ostali bez imovine, odnosno prihoda potrebnih za podmirenje osnovnih stambenih i drugih životnih uvjeta.

DIO DEVETI – KAZNENE ODREDBE**Član 162.**

- (1) Novčanom kaznom od 500,00 KM do 1.000,00 KM kaznit će se za prekršaj Ustanova, kao pravno lice ako:
 - a) korisniku protivno odredbama ovog zakona uskrati ili ograniči prava koja mu pripadaju;
 - b) omogući korištenje prava licu kome ne pripada pravo po ovom zakonu ili mu ne pripada u tom obliku;
 - c) ne otkloni nedostatke utvrđene u vršenju stručnog nadzora u roku utvrđenom u članu 159. stav (2) ovog zakona,
 - d) ne vodi propisane evidencije;
 - e) ne omogući ovlaštenom licu vršenje neposrednog nadzora.
- (2) Za prekršaj iz stava (1) ovog člana kaznit će se i odgovorno lice u Ustanovi, novčanom kaznom od 100,00 KM do 400,00 KM.

Član 163.

Novčanom kaznom od 100,00 do 400,00 KM kaznit će se hranitelj, kod koga je dijete smješteno, ukoliko preduzme važnije mjere u pogledu ličnosti djeteta suprotno članu 50. ovog zakona.

Član 164.

- (1) Novčanom kaznom od 500,00 KM do 1.000,00 KM kaznit će se za prekršaj poslodavac - pravno lice odnosno poslodavac – fizičko lice ako za vrijeme

„Dječije nedjelje“ ne naplaćuje i ne uplaćuje novčane iznose utvrđene odlukom Vlade Federacije BiH u skladu sa članom 95. Federalnog zakona, članom 134. stav (2) i članom 136. stav (1) ovog zakona.

- (2) Za prekršaj iz stava (1) ovog člana kaznit će se i odgovorno lice kod poslodavca – koji je pravno lice novčanom kaznom od 100,00 KM do 400,00 KM.

DIO DESETI – PRIJELAZNE I ZAVRŠNE ODREDBE

Član 165.

Postojeće Ustanove koje obavljaju djelatnost socijalne zaštite dužne su uskladiti pravila i druge opće akte sa odredbama ovog zakona, u roku od 6 mjeseci, od dana stupanja na snagu ovog zakona.

Član 166.

- (1) Po stupanju na snagu ovog zakona, Ministar će donijeti propise i to:

a) U roku od 6 mjeseci:

1. Pravilnik o općim, tehničkim i stručnim uvjetima za osnivanje i rad ustanova socijalne zaštite iz člana 74. stav (5);
2. Pravilnik o normativima stručnih kadrova i smještajnih uvjeta centara, iz člana 79. stav (3);
3. Pravilnik o otkrivanju, ocjenjivanju sposobnosti, razvrstavanju i evidenciji djece ometene u fizičkom ili psihičkom razvoju, iz člana 23. stav (4);
4. Uputstvo o sadržaju i formi iskaznica socijalnih i drugih zaposlenika ustanova socijalne zaštite i nadležnih općinskih službi, iz člana 65. stav (4);
5. Pravilnik o naknadi za rad staratelja i osoba imenovanih za vršenje dužnosti staratelja, iz člana 70. stav (3).

b) U roku od 3 mjeseca:

1. Uputstvo o priznavanju prava zdravstvenog osiguranja i ostvarivanju osnovne zdravstvene zaštite, iz člana 18. stav (2);
2. Uputstvo o načinu vođenja evidencija o korisnicima smještenim u Ustanove, iz člana 77. stav (2).

c) U roku od 2 mjeseca:

1. Uputstvo o načinu vođenja evidencije u oblastima socijalne zaštite i zaštite porodice sa djecom, iz člana 139. stav (7);
2. Uputstvo o načinu obračuna, doznaci sredstava i isplati po osnovu prava, iz člana 120. ovog zakona;
3. Instrukciju o načinu izvršenja revizije rješenja o priznavanju prava na osnovu ovog zakona, iz člana 146.;
4. Pravilnik o postupku ocjenjivanja potrebe za pomoći i njegovom od strane drugog lica, iz člana 30. stav (4).

- (2) Do donošenja propisa iz stava (1) ovog člana primjenjuju se postojeći propisi, ako nisu u suprotnosti sa ovim zakonom.

Član 167.

Prava utvrđena po ovom zakonu prestaju kada prestanu okolnosti koje su bile od uticaja za njihovo priznavanje.

Član 168.

Postupci za ostvarivanje prava započeti prije stupanja na snagu ovog zakona, a koji nisu završeni okončat će se shodno odredbama ovog zakona.

Član 169.

- (1) Na pitanja lica sa invaliditetom, odnosno lica ometenih u psihičkom i fizičkom razvoju u smislu člana 11. stav (1) tačka (e) ovog zakona i druga pitanja koja nisu uređena ovim zakonom, primjenjuje se Federalni zakon.
- (2) Prava iz ovog zakona mogu ostvariti lica, odnosno porodice, koje imaju prebivalište, odnosno boravište na području Kantona.

Član 170.

Danom početka primjene ovog zakona, prestaje primjena propisa o socijalnoj i dječijoj zaštiti i zaštiti civilnih žrtava rata, koji su se do dana stupanja na snagu ovog zakona primjenjivali na području Kantona, i to:

- a) Odluka o pravu na naknadu plaće ženi-majci u radnom odnosu za vrijeme porodijskog odsustva („Službene novine Zeničko-dobojskog kantona“, broj: 14/99 i 10/01),
- b) Odluka o uređivanju prava na novčanu pomoć porodilji koja nije u radnom odnosu („Službene novine Zeničko-dobojskog kantona“, broj: 11/02 i 9/03),
- c) Odluka o odobravanju sredstava za privremeno finansiranje troškova smještaja djece u druge porodice („Službene novine Zeničko-dobojskog kantona“, broj: 12/99).

Član 171.

Ovaj zakon stupa na snagu osmog dana, od dana objavljivanja u „Službenim novinama Zeničko-dobojskog kantona“.

Broj: 01-02-15356/07

Datum, 28.06.2007. godine

Z e n i c a

PREDSJEDAVALAČI

Sejad Zaimović s.r.



Godina XVI - Broj 13

ZENICA, srijeda, 21.09.2011.

SKUPŠTINA

286.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na 11. sjednici, održanoj 07.09.2011. godine, donosi

**ZAKON
O IZMJENI ZAKONA O GRAĐENJU**

Član 1.

U članu 54. u stavu 3. Zakona o građenju („Službene novine Zeničko-dobojskog kantona“, broj: 1/05, 2/08 i 15/09) riječi „do 31.12.2010. godine“ zamjenjuju se riječima „do 31.07.2013. godine“.

Član 2.

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o građenju.

Član 3.

Ovaj Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-22778/11
Datum, 08.09.2011. godine
Zenica

PREDSJEDAJUĆI
Miralem Galijašević, s.r.

287.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 11. sjednici održanoj dana 07.09.2011. godine, donosi

ZAKON

**O IZMJENAMA I DOPUNAMA ZAKONA O
SOCIJALNOJ ZAŠTITI, ZAŠTITI CIVILNIH
ŽRTAVA RATA I ZAŠTITI PORODICE SA
DJECOM**

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj:13/07) u članu 4. u stavu (1), riječi u zagradi „dijete bez roditelja“ zamjenjuju se riječima „dijete bez roditeljskog staranja“.

Član 2.

U članu 6. u stavu (2) iza riječi „koristi“ dodaju se riječi „ili može koristiti“.

Član 3.

U članu 11. u stavu (1) iza tačke j), tačka se zamjenjuje tačkom-zarezom i dodaje se nova tačka k) koja glasi:

„ k) lica koja su žrtve porodičnog nasilja i nasilja u zajednici.“

Član 4.

U članu 13. iza tačke f), tačka se zamjenjuje zarezom i dodaje se nova tačka g) koja glasi:

„ g) lica sa autizmom.“

Član 5.

Iza člana 18. dodaje se novi član 18a. koji glasi:

„Član 18a.

Žrtva porodičnog nasilja i nasilja u zajednici, u smislu člana 11. stav (1) tačka k) ovog zakona je lice kome je

nanesena fizička, psihička i seksualna patnja ili emocionalna šteta, kao i prijetnja takvim djelima ili propuštanja činjenja dužne pažnje, nebriga i nerješavanje osnovnih potreba, što ga ozbiljno sputava da uživa u svojim pravima i slobodama.“

Član 6.

(1) U članu 19. na početku uvodne rečenice dodaje se oznaka „(1)“.

(2) U stavu (1) iza tačke g) tačka se zamjenjuje tačkom-zarezom i dodaje se nova tačka h) koja glasi:

„h) privremeni smještaj i zbrinjavanje u sigurnoj kući.“

(3) Iza stava (1) dodaje se novi stav (2) koji glasi:

„(2) Postupak, uslovi i finansiranje privremenog smještaja i zbrinjavanja u sigurnoj kući bit će uređeni Uputstvom koje će donijeti Ministar.“

Član 7.

U članu 21. u stavu (1) tačka c) iza riječi: „članova porodice“ dodaju se riječi: „niti srodnika“.

Član 8.

U članu 24. u stavu (2) zarez iza riječi „godine“ zamjenjuje se tačkom, a preostali tekst se briše.

Član 9.

U članu 25. u stavu (5) na kraju stava tačka se zamjenjuje zarezom i dodaju riječi: „osim ako im automobil služi kao ortopetsko ili drugo pomagalo, što dokazuju Nalazom i mišljenjem Instituta.“

Član 10.

U članu 26. u stavu (2) iza riječi: „član porodice“ dodaju se riječi: „niti srodnik“.

Član 11.

(1) U članu 30. u stavu (1) tačka na kraju stava zamjenjuje se zarezom i dodaje tekst koji glasi:

„i da nemaju članove porodice niti srodnike koji su po zakonu obavezni da ih izdržavaju, ili ako ih imaju, da ta lica nisu u mogućnosti da izvršavaju obavezu izdržavanja.“

(2) U stavu (2) iza riječi: „65. godina“ stavlja se tačka, a preostali dio teksta se briše.

(3) Stav (5) se briše.

Član 12.

Iza člana 30. dodaje se novi član 30a. koji glasi:

„Član 30a.

(1) Lica sa invaliditetom koji je nastao nakon 65. godine života a kod kojih je, u skladu sa mišljenjem Instituta, utvrđena potreba za korištenjem prava na dodatak za njegu i pomoć od drugog lica ovo pravo ostvaruju u skladu sa ovim zakonom.

(2) Lica iz stava (1) ovog člana razvrstavaju se u dvije grupe u skladu sa odredbama člana 18b. i 18d. Zakona o osnovama socijalne zaštite, zaštite civilnih žrtava rata i zaštite porodice sa djecom („Službene novine Federacije BiH“, broj: 36/99, 54/04, 39/06 i 14/09).

(3) Dodatak za njegu i pomoć od drugog lica za lica sa invaliditetom koji je nastao nakon 65. godine života određuje se u mjesečnom iznosu u procentu od prosječne plaće Kantona, i to:

a) za I. grupu 20 % od prosječne plaće Kantona,

b) za II. grupu 10 % od prosječne plaće Kantona.

(4) Ukoliko planirana sredstva za tekuću budžetsku godinu budu nedovoljna za isplatu novčanih primanja iz stava (3) ovog člana, raspoloživa sredstva dijele se sa iznosom potrebnim za isplatu prema ovom Zakonu i određuje koeficijent za mjesečna davanja koji ostaje na snazi do rebalansa budžeta ili usvajanja novog budžeta.

(5) Refundacija troškova pregleda medicinskog vještačenja kod Instituta vršit će se u skladu sa odredbama člana 11. Federalnog zakona, a prema Uputstvu koje donosi Ministar.“

Član 13.

U članu 31. tačka „d)“ briše se, a dosadašnja tačka e) postaje tačka d).

Član 14.

Iza člana 31. dodaje se novi član 31a. koji glasi:

„Član 31a.

Lice iz člana 30a. ostvaruje pravo na dodatak za njegu i pomoć od strane drugog lica, uz ispunjavanje sljedećih uvjeta:

a) da nije smješteno u ustanovu socijalne zaštite, na teret sredstava općinskog, odnosno kantonalnog Budžeta,

b) da ne ostvaruje pravo na kućnu njegu i pomoć u kući.“

Član 15.

(1) U članu 32. u stavu (1) tačka a) riječi „30,00 KM“ zamjenjuje se riječima „5% od prosječne plaće Kantona“.

(2) U tački b) riječi „50,00 KM“ zamjenjuje se riječima „10% od prosječne plaće Kantona“.

Član 16.

U članu 35. u stavu (2) riječi „300,00 KM“ zamjenjuje se riječima „400,00 KM“.

Član 17.

U članu 43. u stavu (1) iza riječi „usvojitelji“ briše se zarez i riječ „staratelji“.

Član 18.

(1) U članu 54. u stavu (1) iza riječi „usvojitelj“ briše se zarez i riječ „staratelj“.

(2) U stavu (2) iza riječi „usvojitelji“ briše se zarez i riječ „staratelji“, a ispred riječi „zakonu“ dodaje se riječ „Porodičnom“.

Član 19.

U članu 56. u stavu (1) tačka na kraju stava zamjenjuje se zarezom i dodaje tekst koji glasi:

„a snošenje troškova smještaja za lica čiji ukupan prihod domaćinstva ne prelazi iznos minimalne penzije u Federaciji BiH utvrđuje se u visini 50% od pripadajućeg dijela prihoda lica koje se smješta.“

Član 20.

U članu 60. iza stava (2) dodaju se novi stavovi (3) i (4) koji glase:

“(3) U slučaju smrti lica iz stava (1) ovog člana, prvostepeni organ od prodane imovine može raspolagati sa 2/3 sredstava u svrhu razvoja socijalne zaštite, dok je 1/3 sredstava prvostepeni organ dužan uplatiti u Budžet Kantona.

(4) Sredstva iz stava (3) ovog člana uplaćena u Budžet Kantona koristit će se za troškove smještaja u ustanove socijalne zaštite.“

Član 21.

(1) U članu 69. u stavu (1) riječi „odgovarajuće nevladine organizacije“ zamjenjuju se riječima „udruženja, pravnih i fizičkih lica“ a riječ „ispunjava“ zamjenjuje se riječju „ispunjavaju“.

(2) Stav (2) mijenja se i glasi:

„(2) Sa odgovarajućim udruženjem, pravnim i fizičkim

licem koja neposredno pružaju usluge kućne njege i pomoći u kući, imaju iskustvo, posjeduju materijalne i kadrovske kapacitete, općinski prvostepeni organ zaključuje ugovor kojim se preciziraju obim usluga, visina naknada i druga prava i obaveze.“

Član 22.

U članu 73. u stavu (5) u tački b), dodaje se nova alineja 4) koja glasi:

„4) za djecu sa društveno negativnim ponašanjem,“

Član 23.

(1) Naziv Odjeljka C. u Poglavlju III., iznad člana 86. mijenja se i glasi:

„*Odjeljak C. Ustanova za djecu sa posebnim potrebama i djecu sa društveno negativnim ponašanjem*“.

(2) U članu 86. na početku teksta dodaje se oznaka „(1)“.

(3) Iza stava (1) dodaju se novi stavovi (2) i (3), koji glase:

„(2) Prihvatna stanica za djecu sa društveno negativnim ponašanjem vrši prihvatanje i kratkotrajni smještaj djece koja se odaju skitnji, prosjačenju i drugim oblicima društveno negativnog ponašanja, kojima obezbjeđuje potreban kratkotrajni smještaj, ishranu, primjenu zdravstveno-higijenskih mjera i nadzor za vrijeme dok se ne utvrdi mogućnost za njihovo vraćanje roditeljima, usvojitelju, hranitelju, staratelju ili u ustanovu.

(3) Dnevni centar za djecu sa društveno negativnim ponašanjem obezbjeđuje djeci usluge boravka za poludnevni boravak u trajanju do 8 sati dnevno, a za cjelodnevni boravak do 12 sati dnevno. Za vrijeme boravka obezbjeđuju se usluge: prehrane, održavanja lične higijene, brige o zdravlju, čuvanje, odgoj, provođenje slobodnih aktivnosti, igara sa djecom, a za školsku djecu pomoć u učenju i vođenje brige o školskim i vanškolskim aktivnostima i drugo.“

Član 24.

U članu 87., prva riječ „Ustanova“ zamjenjuje se riječju „Ustanove“, te riječ „može“ zamjenjuje se riječju „mogu“.

Član 25.

Član 99. mijenja se i glasi:

„(1) Osnovica za obračun novčanih primanja za lica iz člana 56. Federalnog zakona iznosi 70% od osnovice utvrđene u skladu s federalnim propisima o pravima branitelja i članova njihovih porodica, a lična invalidnina utvrđuje se u mjesečnom iznosu prema grupi oštećenja organizma u procentima, kako slijedi:

Odgovarajućagrupa civilnih žrtava rata	Procenat oštećenja organizma civilne žrtve rata	Mjesečna visina invalidnine u procentu od osnovice
I. grupa	100	100 %
II. grupa	100	73%
III. grupa	90	55%
IV. grupa	80	43%
V. grupa	70	32%
VI. grupa	60	18%

(2) Mjesečno lično novčano primanje za lica iz člana 54. stav (3) Federalnog zakona utvrđuje se u visini osnovice iz stava (1) ovog člana.

(3) Sredstva za isplatu novčanih primanja iz ovog člana osiguravaju se u omjeru 70 % iz Federalnog budžeta i 30 % iz Budžeta Zeničko-dobojskog kantona (u daljem tekstu: kantonalni Budžet).

(4) Osnovica i mjesečni iznosi novčanih primanja usklađuju se na način kako se vrši usklađivanje novčanih primanja za korisnike prava po propisima o pravima branitelja i članova njihovih porodica.“

Član 26.

Član 101. se briše.

Član 27.

U članu 112. u stavu (1) iza tačke i) tačka se zamjenjuje tačkom-zarezom i dodaju se nove tačke j), k) i l) koje glase:

„j) zdravstvena zaštita za djecu od rođenja do polaska u osnovnu školu koja nisu zdravstveno osigurana kao članovi porodice osiguranika;

k) zdravstvena zaštita za nezaposlene samohrane majke - porodilje za vrijeme trudnoće, porođaja i do uzrasta djeteta do godinu dana, ako nisu osigurani po drugom osnovu;

l) zdravstvena zaštita za lica starija od 65. godina (muškarac), odnosno 60. godina (žena).“

Član 28.

U članu 113. u stavu (2) u trećem redu, iza riječi: „roditelj“ dodaju se riječi „ili dijete“.

Član 29.

U članu 118. tačka na kraju teksta zamjenjuje se zarezom i dodaje tekst, koji glasi:

„osim djetetu koje koristi pravo na osposobljavanje na samostalan život i rad.“

Član 30.

U članu 128. u stavu (1) riječi „posljednje objavljene“ se brišu.

Član 31.

U članu 166. u stavu (1) u tački a), iza alineje 5. tačka se zamjenjuje tačkom-zarezom i dodaju se nove alineje 6. i 7. koje glase:

„6. Uputstvo o postupku, uslovima i finasiranju privremenog smještaja i zbrinjavanja u sigurnoj kući;

7. Uputstvo o postupku priznavanja nadoknade troškova medicinskog vještačenja u prvom stepenu.“

Član 32.

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o socijalnoj zaštiti, zaštiti civilnih žrtava rata i zaštiti porodice sa djecom.

Član 33.

Ovaj Zakon stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj: 01-02-22779/11

Datum, 08.09.2011. godine

Zenica

PREDSJEDAVALAČI

Miralem Galijašević, s.r.

.....

у Општини Усора према попису становништва из 1991. године, а према садашњој административно-територијалној подјели Општине, имајући у виду императивну уставну одредбу која налаже да овлашћења у вези са образовањем сваки кантон је дужан пренијети на општину ако у погледу националног састава већинско становништво те општине није већинско становништво у кантону као цјелини, а што је утврђено и из Пресуде овог суда број: У-8/08 од 04.12.2008. године, која је утврдила релевантну судску праксу у оваквим ситуацијама, на сједници Суда без јавне расправе одржане дана 24.02.2015. године, донијета је одлука као у изреци.

Ову пресуду Уставни суд Федерације донио је већином од шест гласова у саставу: др сц. Ката Сењак, предсједница Суда, Сеад Бахтијаревић, Весна Будимир, Мирјана Чучковић, Домин Малбашић, Александра Маргиновић и проф. др Един Муминовић, судије Суда.

Број: У-65/14

24.02.2015. године
С а р а ј е в о

Предсједница

Уставног суда Федерације
Босне и Херцеговине
др сц. Ката Сењак

SKUPŠTINA

90.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 7. sjednici održanoj dana 21.04.2015. године, d o n o s i

ZAKON

o izmjenama i dopuni Zakona o socijalnoj zaštiti, zaštiti civilnih žrtava rata i zaštiti porodice sa djecom

Član 1.

(1) U Zakonu o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07 i 13/11 - u daljem tekstu: Kantonalni zakon), članovi 30a. i 31a. se brišu.

(2) Postupci za ostvarivanje prava na dodatak za pomoć i njegu od drugog lica, započeti prije stupanja na snagu ovog zakona, a koji nisu završeni okončat će se po odredbama Federalnog zakona.

Član 2.

U članu 143. dodaje se novi stav (2) koji glasi:

„(2) Na osnovu prijave ili saznanja o nastaloj promjeni koja je od uticaja za ostvarivanje i obim prava, prvostepeni organ će pokrenuti postupak odmah, a najkasnije u roku od 15 dana od dana saznanja za promjenu i donijeti rješenje o prestanku ili izmjeni priznatih prava prema ovom zakonu, sa pravnim dejstvom od prvog dana narednog mjeseca po nastaloj promjeni.“

Dosadašnji tekst člana 143. postaje stav (1).

Član 3.

Ovaj Zakon stupa na snagu narednog dana od dana objavljivanja u “Službenim novinama Zeničko-dobojskog kantona”.

Broj: 01-02-9165/15

Datum, 22.04.2015. године

Zenica

PREDSJEDAVALA

Draženka Subašić, s.r.

91.

Na osnovu Amandmana XVII na Ustav Zeničko-dobojskog kantona, («Službene novine FBiH», broj: 7/96, «Službene novine Zeničko-dobojskog kantona», broj: 1/96, 10/00, 8/04 i 10/04) i člana 186. stav 2. Poslovnika Skupštine Zeničko-dobojskog kantona-Novih prečišćeni tekst («Službene novine Zeničko-dobojskog kantona», broj: 7/12 i 12/13), predsjedavajuća Skupštine Zeničko-dobojskog kantona, uz konsultaciju sa zamjenicima predsjedavajuće, na 1. sjednici održanoj 17.02.2015. године, donijela je:

ODLUKU

o imenovanju kandidata za premijera Zeničko-dobojskog kantona

Član 1.

(Imenovanje kandidata za premijera Kantona)

Za kandidata za premijera Zeničko-dobojskog kantona imenuje se Galijašević Miralem, dipl. ecc. iz Zenice.

Član 2.

(Dostavljanje prijedloga kandidata za ministre u Vladi Kantona)

Galijašević Miralem, kandidat za premijera Zeničko-dobojskog kantona će, u roku od najmanje sedam dana prije početka sjednice Skupštine Kantona na kojoj će se vršiti potvrđivanje Vlade Kantona, dostaviti predsjedavajućoj Skupštine prijedlog kandidata za ministre u Vladi



Broj: 03-02-2755-1/16
Zenica, 11.02.2016 godine

**MINISTARSTVO ZA RAD,
SOCIJALNU POLITIKU I IZBJEGLICE
ZENIČKO-DOBOJSKOG KANTONA**

PREDMET: Mišljenje o prijedlogu Zakona o izmjenama Zakona socijalnoj zaštiti, zaštiti civilnih žrtava rata i zaštiti porodice sa djecom - dostavlja se

U skladu sa članom 2. Uredbe o Sekretarijatu za zakonodavstvo Vlade Zeničko – dobojskog kantona («Službene novine Federacije BiH» broj 8/96 i «Službene novine Zeničko – dobojskog kantona» broj: 2/05) i članom 31. stav (1) tačka a) Poslovnika o radu Vlade Zeničko-dobojskog kantona (“Službene novine Zeničko – dobojskog kantona” broj: 5/11), te na osnovu uvida u tekst prijedloga Zakona o izmjenama Zakona socijalnoj zaštiti, zaštiti civilnih žrtava rata i zaštiti porodice sa djecom u postupku koji se odnosi na utvrđivanje usklađenosti istog sa Ustavom, pravnim sistemom i metodološkim jedinstvom u izradi propisa dostavljamo vam slijedeće

MIŠLJENJE

Ustavni i pravni osnov prijedloga Zakona o izmjenama Zakona socijalnoj zaštiti, zaštiti civilnih žrtava rata i zaštiti porodice sa djecom (u daljem tekstu: Zakon) je pravilno utvrđen.

Prijedlog Zakona je urađen u skladu sa Ustavom, pravnim sistemom i Jedinstvenim pravilima za izradu pravnih propisa u Zeničko-dobojskom kantonu („Službene novine Zeničko-dobojskog kantona“ broj 5/08).

Iako se u pravilu zakoni donose u redovnoj proceduri, a kako u konkretnom slučaju nije u pitanju složen i obiman zakon, osnovan je prijedlog da se isti razmatra u formi prijedloga, koji bi Skupština pretresala po skraćenom postupku, bez nacrtu zakona (član 140. stav 1. Poslovnika Skupštine Zeničko-dobojskog kantona – Novi prečišćen tekst (“Službene novine Zeničko-dobojskog kantona” broj 7/12 i 12/13).

Shodno navedenom, mišljenja smo da se predmetni akt može uputiti u dalju proceduru.

S poštovanjem!

Dostavljeno:
1 x Naslovu,
1 x a/a

SEKRETAR
Berjana Ačkar
Berjana Ačkar



Ministarstvo za rad, socijalnu politiku i
izbjeglice
n/r ministra
-ovdje-

Zenica, 12.2.2016. godine

Veza Vaš broj: 09-02-2755/16 od 10.2.2016.

Naš znak: 06/02 - 09-2455-1/16

PREDMET: Nacrt Zakona o izmjenama Zakona o socijalnoj zaštiti civilnih žrtava rata i zaštiti porodice sa djecom - stajalište, dostavlja se

Sukladno članku 11. Zakona o kantonalnim ministrstvima i drugim tijelima kantonalne uprave („Službene novine Zeničko-dobojskog kantona“, broj: 10/15), Ministarstvo za pravosuđe i upravu Zeničko-dobojskog kantona, u postupku utvrđivanja usklađenosti sa:

- Europskom konvencijom o zaštiti ljudskih prava i sloboda i drugim pravima;
- Zakonom o prekršajima u Federaciji Bosne i Hercegovine („Službene novine Federacije Bosne i Hercegovine“, broj: 63/14);
- Zakonom o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05) i
- Zakonom o kantonalnim ministrstvima i drugim tijelima kantonalne uprave („Službene novine Zeničko-dobojskog kantona“, broj: 10/15), daje slijedeće

stajalište

Nacrt Zakona o izmjenama Zakona o socijalnoj zaštiti civilnih žrtava rata i zaštiti porodice sa djecom u predloženom tekstu ne sadrži odredbe koje se odnose na navedene propise, tako da ovo ministarstvo sukladno članku 11. Zakona o kantonalnim ministrstvima i drugim tijelima kantonalne uprave, ne može dati stajalište o istom.

S poštovanjem.

Dostavljeno:
1 x Naslovu
1 x U pismohranu



Bosna i Hercegovina
FEDERACIJA BOSNE I HERCEGOVINE
ZENIČKO-DOBOJSKI KANTON
MINISTARSTVO FINANSIJA



Bosnia and Herzegovina
FEDERATION OF BOSNIA AND
HERZEGOVINA
ZENICA-DOBOJ CANTON
MINISTRY OF FINANCE

Broj: 07-02/02-2755-1/16
 Zenica, 15.02.2016. godine

MINISTARSTVO ZA RAD, SOCIJALNU POLITIKU I IZBJEGLICE

PREDMET: Mišljenje na Prijedlog Zakona o izmjenama Zakona o socijalnoj zaštiti,
 zaštiti civilnih žrtava rata i zaštiti porodice sa djecom – *dostavlja se*

Ministarstvo finansija je razmotrilo Prijedlog Zakona o izmjenama Zakona o socijalnoj zaštiti, zaštiti civilnih žrtava rata i zaštiti porodice sa djecom, te u skladu sa članom 31. stav (1) tačka c) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 5/11), u pogledu finansijskih sredstava potrebnih za izvršenje propisa, daje slijedeće

MIŠLJENJE

Prijedlogom Zakona o izmjenama Zakona o socijalnoj zaštiti, zaštiti civilnih žrtava rata i zaštiti porodice sa djecom, proširuju se prava, a primjena Prijedloga Zakona će iziskivati potrebu izdvajanja dodatnih finansijskih sredstava iz Budžeta Zeničko-dobojskog kantona.

Članom članom 5. stav 2. Zakona o budžetima u FBiH („Službene novine FBiH“, broj: 102/13, 9/14, 13/14, 8/15 i 91/15), propisano je da „propisi koji imaju finansijske posljedice na budžet moraju biti obrazloženi, odnosno opravdani analizom troškova i koristi“.

U obrazloženju Zakona navedeno je da je za prava predviđena izmjenama Zakona „potrebno obezbijediti dodatna sredstva u Budžetu Kantona“.

S tim u vezi, za donošenje i primjenu Prijedloga Zakona potrebno je u Budžetu Kantona za 2016. godinu i u Budžetima za naredne godine, planirati dodatna finansijska sredstva.

S poštovanjem!

Dostavljeno:

1x Naslovu,
 1x a/a.


 MINISTAR
Andrej Kajić



7